

洛水 漉水

伊水 瀘水



洛水 瀘水

澗水 渭水

穀水

甘水

漆水

水經注釋卷十五



仁和趙一清誠夫錄

洛水

伊水

灑水

澗水

洛水出京兆上洛縣謹舉山

地理志曰洛出冢嶺山山海經曰出上洛西山

一清按此文在

海內

東經又曰謹舉之山洛水出焉

一清按此文在中山經

東與丹水

合水出西北竹山東南流注于洛

全氏曰按丹水不入洛道元繆也洛

水又東尸水注之水北出尸山南流入洛洛水又東得

乳水水北出良餘山南流注于洛洛水又東會于龍餘

之水山海經曰水出蠱尾之山東流入洛洛水又東至

陽虛山合于元扈之水

一清按山海經曰雒水東北流注于元扈之水又曰陽虛之山

臨于元扈之水道元蓋抄變其詞

是也又曰自鹿蹠之山以至元扈之

山凡九山元扈亦山名也而通與謹舉為九山之次焉

故山海經曰此二山者洛間也是知元扈之水出于元

扈之山蓋山水兼受其目矣其水逕于陽虛之下山海

經又曰陽虛之山臨于元扈之水是為洛汭也河圖玉

版曰倉頡為帝南巡登陽虛之山臨于元扈洛汭之水

靈龜負書丹甲青文以授之即於此水也洛水又東歷

清池山傍東合武里水水南出武里山東北流注于洛

洛水又東門水出焉爾雅所謂洛別為波也

全氏曰波水見穀水

注道元以門水當之恐非王伯厚亦云

洛水又東要水入焉水南出三要

山東北逕拒陽城西而東北流入于洛洛水又東與獲

水合水南出獲輿山俗謂之備水也東北逕獲輿川世

名之為卻川東北流注于洛洛水又東逕熊耳山北禹

貢所謂導洛自熊耳博物志曰洛出熊耳蓋開其源者

是也

一清按漢志宏農郡上雒縣禹貢雒水出豕嶺山又云熊耳獲輿山在東北此即所謂連麓而異名也

東北過盧氏縣南

洛水逕陽渠關北陽渠水南出陽渠山即荀渠山也其

水一源兩分川流半解一水西北流屈而東北入于洛

山海經曰熊耳之山浮豪之水出焉西北流注于洛疑卽是水也荀渠蓋熊耳之殊稱若太行之歸山也故地說曰熊耳之山地門也洛水出其間是亦總名矣其一水東北逕陽渠城西故關城也其水東北流注于洛洛水又東逕盧氏縣故城南竹書紀年晉出公十九年晉韓龐取盧氏城王莽之昌富也有盧氏川水注之水北出盧氏山東南流逕盧氏城而東流注于洛水又東翼合三川竝出縣之南山東北注洛開山圖曰盧氏山宜五穀可避水災亦通謂之石城山山在宜陽山西南千名之山咸處其內陵阜原陁易以度身者也又有葛蔓

谷水自南山流注洛水洛水又東逕高門城南卽宋書所謂後軍外兵龐季明入盧氏進達高門木城者也洛水東與高門水合水出北山東南流合洛水枝津水上承洛水東北流逕石勒城北又東逕高門城北東入高門水亂流南注洛洛水又東松陽溪水注之水出松陽山北流注于洛洛水又東逕黃亭南又東合黃亭溪水水出鷓鴣山山有二峯峻極于天高崖雲舉亢石無階猿徒喪其捷巧鼉族謝其輕工及其長霄冒顛層霞冠峯方乃就辨優劣耳故有大小鷓鴣之名矣谿水東南流歷亭下謂之黃亭谿水又東南入于洛水洛水又

東得荀公谿口水出南山荀公澗卽龐季明所入荀公  
谷者也其水歷谷東北流注于洛水洛水又東逕檀山  
南其山四絕孤峙山上有塢聚俗謂之檀山塢義熙中  
劉公西入長安舟師所屆次于洛陽命參軍戴延之與  
府舍人虞道元卽舟溯流窮覽洛川欲知水軍可至之  
處延之屆此而返竟不達其源也洛水又東庫谷水注  
之水自宜陽山南三川竝發合爲一谿東北流注于洛  
洛水又東得鶉鵠水口水北發鶉鵠澗東南流入于洛  
洛水又逕僕谷亭北左合北水水出北山東南流注于  
洛洛水又東侯谷水出南山北流入于洛洛水又東逕

龍驤城北龍驤將軍王鎮惡從劉公西入長安陸徑所  
由故城得其名洛水又東左合宜陽北山水水自北谿  
南流注洛洛水又東廣由澗水注之水出南山由谿北  
流逕龍驤城東而北流入于洛洛水又東右得直谷水  
水出南山北逕屯城西北流注于洛水也

又東北過蠡城邑之南

城西有塢水出北四里山上原高二十五丈故黽池縣  
治南對金門塢水南五里舊宜陽縣治也洛水右會金  
門谿水水南出金門山北逕金門塢西北流入于洛洛  
水又東合款水水有二源竝發兩川逕引謂之大款水

也合而東南入于洛洛水又東黍良谷水入焉南出金

門山開山圖曰山多重固在韓建武二年強弩偏將軍

陳俊一清按後漢書陳俊傳建武二年秋大司馬吳漢承制拜俊為疆弩大將軍注云偏將軍蓋誤也

轉擊金門白馬皆破之即此也而東北流注于洛洛水

又東左合北谿南流入于洛也

又東過陽市邑南又東北過于父邑之南一清按寰宇記引此作文邑誤

太陰谷水南出太陰谿北流注于洛洛水又東合白馬

谿水出宜陽山澗有大石厥狀似馬故谿澗以物色受

名也谿水又東北流注于洛洛水又東有昌澗水注之

水出西北宜陽山而東南流逕宜陽故郡南舊陽市邑

也故洛陽都典農治此後改為郡其水又東南注于洛

洛水又東逕一合塢南城在川北原上高二十丈南北

東三箱天嶮峭絕唯築西面即為合固一合之名起於

是矣劉曜之將攻河南也晉將軍魏該奔於此故於父

邑也洛水又東合杜陽澗水水出西北杜陽谿東南逕

一合塢東與槃谷水合亂流東南入洛洛水又東渠谷

水出宜陽縣南女几山東北流逕雲中塢左上迢遶層

峻流烟半垂纓帶山阜故塢受其名水又東北入洛水

臧榮緒晉書稱孫登嘗經宜陽山作炭人見之與語登

不應作炭者覺其情神非常咸共傳說太祖聞之使阮

籍往觀與語亦不應籍因大嘯登笑曰復作向聲又爲嘯求與俱出登不肯籍因別去登上峯行且嘯如簫韶笙簧之音聲振山谷籍怪而問作炭人作炭人曰故是向人聲籍更求之不知所止推問久之乃知姓名余按孫綽之敘高士傳言在蘇門山又別作登傳孫盛魏春秋亦言在蘇門山又不列姓名阮嗣宗感之著大人先生論言吾不知其人既神遊自得不得與物交阮氏尚不能動其英操復不識何人而能得其姓名

又東北過宜陽縣南

洛水之北有熊耳山雙巒競舉狀同熊耳此自別山不

與禹貢導洛自熊耳同也昔漢光武破赤眉樊崇積甲

仗與熊耳平卽是山也山際有池池水東南流水側有

一池世謂之鼃池矣又東南逕宜陽縣故城西謂之西

度水又東南流入于洛洛水又東逕宜陽縣故城南秦

武王以甘茂爲左丞相曰寡人欲通三川窺周室死不

朽矣茂請約魏以攻韓斬首六萬遂拔宜陽城故韓地

也後乃縣之漢哀帝封息夫躬爲侯國全氏曰本傳及表是封宜陵屬

杜衍杜衍南陽之屬縣也善長誤以爲宜陽城之西門赤眉樊崇與盆子及

大將等奉璽綬劔壁處世祖不卽見明日陳兵于洛水

見盆子等謂盆子丞相徐宣曰不悔乎宣曰不悔上歎

曰卿庸中皦皦鐵中錚錚也洛水又東與厭染之水合水出縣北傅山大陂山無草木其水自陂北流屈而東南注世謂之五延水又東南流逕宜陽縣故城東東南流注于洛洛水又東南黃中澗水出北阜二源奇發總成一川東流注于洛洛水又東祿泉水注之其水北出近谿洛水又東共水入焉水北出長石之山山無草木其西有谷焉厥名共谷共水出焉南流得尹谿口水出西北尹谷東南注之其水右與西南左澗水會水東出近川西流注于共水共水又南與李谷水合水出西北李谿東南注蓁水蓁水發源蓁谷西南流與李谷水合

而西南流入共水共水世謂之石頭泉而南流注于洛洛水又東黑澗水南出陸渾西山歷于黑澗西北入洛洛水又東臨亭川水注之水出西北近溪東南與長澗水會水出北山南入臨亭水又東南歷九曲西而南入洛水也

又東北出散關南

洛水東逕九曲南其地十里有坂九曲穆天子傳所謂天子西征升于九阿此是也洛水又東與豪水會水出新安縣密山南流歷九曲東而南流入于洛洛水之側有石墨山山石盡黑可以書疏故以石墨名山矣洛水



又東枝瀆左出焉東出關絕惠水又逕清女冢南冢在北山上者舊傳云斯女清貞秀古跡表來今矣枝瀆又東逕周山上有周靈王冢皇覽曰周靈王葬於河南城西南周山上蓋以王生而神故諡曰靈其冢人祠之不絕又東北逕柏亭南皇覽曰周山在柏亭西北謂斯亭也又東北逕三王陵穀水東北出焉一清按此文當與穀水篇注參證三王或言周景王悼王定王也魏司徒公崔浩注西征賦云定當爲敬子朝作難西周政弱人荒悼敬二王與景王俱葬於此故世以三王名陵帝王世紀曰景王葬于翟泉今洛陽太倉中大冢是也而復傳言在此所未

詳矣又悼敬二王稽諸史傳復無葬處今陵東有石碑錄赧王以上世王名號考之碑記周墓明矣枝瀆東北歷制鄉逕河南縣王城西歷邾鄔陌杜預釋地曰縣西有邾鄔陌謂此也枝瀆又北入穀蓋經始周啓瀆久廢不修矣洛水自枝瀆又東出關惠水右注之世謂之八關水戴延之西征記謂之八關澤卽經所謂散關鄣自南山橫洛水北屬於河皆關塞也卽楊僕家僮所築矣惠水出白石山之陽東南流與瞻水合水東出婁涿之山而南流入惠水惠水又東南謝水北出瞻諸之山東南流又有交觸之水北出廩山南流俱合惠水惠水又

南流逕關北城二十里者也其城西岨塞垣東枕惠水  
 靈帝中平元年以河南尹何進為大將軍率五營士屯  
 都亭置函谷廣城伊闕大谷轅轅旋門小平津孟津等  
 八關都尉官治此函谷為之首在八關之限故世人惣  
 其統目有八關之名矣其水又南流入于洛水山海經  
 曰白石之山惠水出其陽而南流注于洛謂是水也洛  
 水又與號水會水出林楮一清按山海經作扶楮之山北流注于  
 洛水其南則鹿蹠之山也世謂之非山其山陰則峻絕  
 百仞陽則原阜隆平甘水發于東麓北流注于洛水也  
 又東北過河南縣南

周書稱周公將致政乃作大邑成周于中土南繫于洛  
 水北因于邠山以為天下之大湊孝經援神契曰八方  
 之廣周洛為中謂之洛邑竹書紀年晉定公二十年洛  
 絕于周魏襄王九年洛入成周山水大出南有甘洛城  
 郡國志所謂甘城也地記曰洛水東北過五零陪尾北  
 與澗瀍合是二水東入千金渠故瀆存焉  
 又東過洛陽縣南伊水從西來注之

洛陽周公所營洛邑也故洛誥曰我卜瀍水東亦惟洛  
 食其城方七百二十丈南繫于洛水北因于邠山以為  
 天下之湊方六百里因西方八百里為千里春秋昭公

三十二年晉合諸侯大夫成周之城故亦曰成周也  
 司馬遷自序云太史公留滯周南摯仲治曰古之周南  
 今之洛陽漢高祖始欲都之感婁敬之言不日而駕行  
 矣屬光武中興宸居洛邑逮于魏晉咸兩宅焉故魏略  
 曰漢火行忌水故去其水而加佳魏為土德土水之牡  
 也水得土而流土得水而柔除佳加水一清按師古曰如魚氏說則光  
 武以後改為雒字也長沙耆舊傳云祝良字召卿為洛陽令歲時  
 亢旱天子祈雨不得良乃曝身階庭告誡引罪自晨至  
 午紫雲沓起甘雨登降人為歌曰天久不雨烝人失所  
 天王自出祝令特苦精符感應滂沱下雨全氏曰下則有脫文

縣司及河南尹治司隸周官也

一清按續漢書百官志曰司隸校尉本注曰孝

武初置劉昭補注引荀綽晉百官表注曰司隸校尉漢周官也征和中依周置司隸周無司隸豈即司寇乎漢

武帝使領徒隸董督京畿後世因名司州焉地記曰洛

水東入于中提山閒東流會于伊是也昔黃帝之時天

大霧三日帝遊洛水之上見大魚煞五牲以醮之天乃

甚雨七日七夜魚流始得圖書今河圖視萌篇是也昔

王子晉好吹鳳笙招延道士與浮邱同遊伊洛之浦舍

始又受玉雞之瑞於此水亦洛神宓妃之所在也洛水

又東合水南出半石之山北逕合水塢而東北流注于

公路澗但世俗音譌號之曰光祿澗非也上有袁術固

四周絕澗迢遰百仞廣四五里有一水淵而不流故谿澗卽其名也合水北與劉水合水出半石東山西北流注于劉聚三面臨澗在緱氏西南周畿內劉子國故謂之劉澗其水西北流注于合水合水又北流注于洛水也

又東過偃師縣南

洛水東逕計素渚中朝時百國貢計所頓故渚得其名又東逕偃師故縣南與緱氏分水又東休水自南注之其水導源少室山西流逕穴山南而北與少室山水合水出少室北溪西南流注休水休水又左會南溪水發

大穴南山北流入休水休水又西南北屈潛流地下其故瀆北屈出峽謂之大穴口北歷覆釜堆東蓋以物象受名矣又東屈零星塢水流潛通重源又發緱氏原側開山圖謂之緱氏山也亦云仙者昇焉言王子晉控鶴斯阜靈王望而不得近舉手謝而去其家得遺屣俗亦謂之爲撫父堆堆上有子晉祠或言在九山非此世代已遠矣莫能辨之劉向列仙傳云世有簫管之聲焉休水又逕延壽城南緱氏縣治故滑費春秋滑國所都也王莽更名中亭卽緱氏城也城有仙人祠謂之仙人觀休水又西轉北屈逕其城西水之西南有司空密陵元

侯鄭袤廟碑文缺不可復識又有晉城門校尉昌原恭  
侯鄭仲林碑晉皇始一清按晉武帝改元泰始無皇始  
年蓋道元六年立休水又北流注于洛水洛水又東逕  
誤記也

百谷塢北戴延之西征記曰塢在川南因高為塢高一  
十餘丈劉武王西入長安舟師所堡也洛水又北陽渠  
水注之竹書紀年晉襄公六年洛絕于河即此處也洛  
水又北逕偃師城東東北歷鄆中水南謂之南鄆亦曰  
上鄆也逕訾城西司馬彪所謂訾聚也而鄆水注之水  
出北山鄆谿其水南流世謂之溫泉水水側有僵人穴  
穴中有僵尸戴延之從劉武王西征記曰有此尸尸今

猶在夫物無不化之理魂無不遷之道而此尸無神識  
事同木偶之狀喻其推移未若正形之速遷矣鄆水又  
東南於訾城西北東入洛水故京相璠曰今鞏洛渡北  
有鄆谷水東入洛謂之下鄆故有上鄆下鄆之名亦謂  
之北鄆於是有南鄆北鄆之稱矣又有鄆城蓋周大夫  
鄆肸之舊邑洛水又東逕訾城北又東羅水注之水出  
方山羅川西北流蒲池水注之水出南蒲陂西北流合  
羅水謂之長羅川亦曰羅中也蓋肸子鄆羅之宿居故  
川得其名耳羅水又西北白馬谿水注之水出崧山北  
麓逕白馬塢東而北入羅水西北流白桐澗水注之水

出崧麓桐溪北流逕九山東又北九山谿水入焉水出  
 百稱山東谷其山孤峯秀出嶢嶢分立仲長統曰昔密  
 有卜成者身遊九山之上放心不拘之境謂是山也山  
 際有九山廟廟前有碑云九山顯靈府君者太華之元子  
 陽九列名號曰九山府君也南據崧岳北帶洛澗晉元  
 康二年九月太歲庚午朱氏謀瑋箋云謝云一作太歲  
 在戌按世譜晉元康二年太歲  
在壬子而用歷經推之是年  
 九月乙亥朔無庚午日也帝遣殿中中郎將關內侯  
 樊廣緱氏令王與主簿傅演奉宣詔命興立廟殿焉又  
 有百蟲將軍顯靈碑碑云將軍姓伊氏諱益字隤敬帝  
 高陽之第二子伯益者也晉元康五年七月七日順人

吳義等建立堂廟永平元年二月二十日刻石立頌贊

示後賢矣

沈氏曰惠帝紀年先永平後元康如何後建  
 廟先立石若云元魏之永平相去又遠後有

永康永寧永興三元  
 皆以永紀莫能定也

其水東北流入白桐澗又北逕袁

公塢東蓋公路始固有此也故有袁公之名矣北流注

于羅水羅水又西北逕袁公塢北又西北逕潘岳父子

墓前有碑岳父茈瑯琊太守碑石破落文字缺敗岳碑

題云給事黃門侍郎潘君之碑碑云君遇孫秀之難闔

門受禍故門生感覆醢以增慟乃樹碑以記事太常潘

尼之辭也羅水又於訾城東北入於洛水也

又東北過鞏縣東又北入于河

洛水又東明樂泉水注之水出南原下五泉竝導故世謂之五道泉即古明谿泉也春秋昭公二十二年師次于明谿者也洛水又東逕鞏縣故城南東周所居也本周之畿內鞏伯國也春秋左傳所謂尹文公涉于鞏即於此也洛水又東濁水注之即古湟水也水出南原京相璠曰訾城北三里有黃亭即此亭也春秋所謂次于黃者也洛水又東北河水發南谿石泉世亦名之為石泉水也京相璠曰鞏東地名坎飲在河水東疑即此水也又逕盤谷塢東世又名之曰盤谷水司馬彪郡國志鞏有坎飲聚春秋僖公二十四年王出及坎飲服虔亦

以為鞏東邑名也今考厥文若狀焉而不能精辨耳晉

太康地記晉書地道記竝言在鞏西非也其水又北入

洛洛水又東北流入于河山海經曰洛水成臯西入河

是也一清按山海經曰洛水出洛西山東北注河入成臯之西道元蓋鈔變其詞謂之洛汭

即什谷也故張儀說秦曰下兵三川塞什谷之口謂此

川也史記音義曰鞏縣有鄆谷水者也黃帝東巡河過

洛修壇沈璧受龍圖于河龜書于洛赤文綠字堯帝又

修壇河洛擇良議沈榮光出河休氣四塞白雲起迴風

逝赤文綠色廣袤九尺負理平上有列星之分七政之

度帝王錄記興亡之數以授之堯又東沈書於日稷赤

光起元龜負書背甲赤文成字遂禪于舜舜又習堯禮  
 沈書於日稷赤光起元龜負書至于稷下榮光休至黃  
 龍卷甲舒圖壇畔赤文綠錯以授舜舜以禪禹殷湯東  
 觀于洛習禮堯壇降璧三沈榮光不起黃魚雙躍出濟  
 于壇黑烏以浴隨魚亦止化為黑玉赤勒之書黑龜赤  
 文之題也湯以伐桀故春秋說題辭曰河以道坤出天  
 苞洛以流川吐地符全氏曰元文是河以通乾出天苞  
 洛以流坤吐地符古坤字與上  
 文複則知道坤二  
 字是妄人所填寫王者沈禮焉竹書紀年曰洛伯用與  
 河伯馮夷鬪蓋洛水之神也昔夏太康失政為羿所逐  
 其昆弟五人須于洛汭作五子之歌於是地矣

伊水出南陽魯陽縣西蔓渠山

山海經曰蔓渠之山伊水出焉淮南子曰伊水出上魏  
 山地理志曰出熊耳山即麓大同陵巒互別耳伊水自  
 熊耳東北逕鸞川亭北菱水出菱山北流際其城東而  
 北入伊水世人謂伊水為鸞水菱水為交水故名斯川  
 為鸞川也又東為淵潭潭渾若沸亦不測其深淺也伊  
 水又東北逕東亭城南又屈逕其亭東東北流者也  
 東北過郭落山

陽水出陽山陽谿世人謂之大陽谷水亦取名焉東流  
 入伊水伊水又東北鮮水入焉水出鮮山北流注于伊



伊水又與蠻水合水出盧氏縣之蠻谷東流入于伊  
又東北過陸渾縣南

山海經曰瀟瀟之水出于釐山南流注于伊水今水出  
陸渾縣之西南王母澗澗北山上有王母祠故世因以  
名谿東流注于伊水即瀟瀟之水也伊水歷崖口山峽  
也翼崖深高壁立若闕崖上有塢伊水逕其下歷峽北  
流即古三塗山也杜預釋地曰山在縣南闕駟十三州  
志云山在東南今是山在陸渾故城東南八十許里春  
秋昭公四年司馬侯曰四嶽三塗陽城太室荆山中南  
九州之險也服虔曰三塗大行轅轅嶠龜非南望也京

相璠著春秋土地名亦云山名也以服氏之言云塗道

也準周書南望之文

一清按漢志註臣瓚引周書度邑篇曰武王問太公曰吾將有夏之

居南望過于三塗北瞻望于有河冊府元龜引周書度邑曰武王問太公曰吾將因有夏之居也南望過於三塗北詹望于清河服言宜為轅轅大道伊闕皆為非也  
即道元所稱引者

春秋晉伐陸渾請有事于三塗知是山明矣有七谷水

注之水西出女机山

一清按女机仙人姓名太霄經云朱中嘗以素書倚酒于女机家几

盜寫學其術女机陳市酒婦也寰宇記陝縣女机山九州要紀云富祿縣有女机年八十居陳畱沽酒得道後飛昇于此山蓋山因人得名後人加木作机非也富祿即郡國志酒泉郡之福祿地理志曰祿福也之南

七谿山上有西王母祠東南流注于伊水又北蚤谷水

注之水出女机山之東谷東逕故亭南東流入于伊水

伊水又東北逕伏流嶺東嶺上有崑崙祠民猶祈焉劉澄之永初記稱陸渾縣西有伏流坂者也今山在縣南崖口北三十里許西則非也北與溫泉水合水出新城縣之狼羣山西南阜下西南流會于伊水伊水又東北逕伏睹嶺左納焦澗水水西出鹿膊山東流逕孤山南其山介立豐上單秀孤峙故世謂之方山卽劉中書澄之所謂縣有孤山者也東歷伏睹嶺南東流注于伊伊水又東北涓水注之水出陸渾西山卽陸渾都也尋郭文之故居訪胡昭之遺像世去不停莫識所在其水有二源俱導而東注號略在陸渾縣西九十里也司馬彪

郡國志曰縣西號略地春秋所謂東盡號略者也北水東流合侯澗水水出西北侯谿東南流注于涓水涓水又東逕陸渾縣故城北平王東遷辛有適伊川見有被髮而祭于野者曰不及百年此其戎乎魯僖公二十二年秦晉遷陸渾之戎于伊川故縣氏之也涓水東南流左合南水水出西山七谷亦謂之七谷水阻澗東逝歷其縣南又東南左會北水亂流左合禪渚渚水上承陸渾縣東禪陂渚在原上陂方十里佳饒魚葦卽山海經所謂南望禪渚禹父之所化郭景純注云禪一音暖鯨化羽淵而復在此然已變怪亦無往而不化矣世謂此

澤爲慎望陂陂水南流注于涓陽水涓陽水又東南注于伊水昔有莘氏女採桑于伊川得嬰兒于空桑中言其母孕于伊水之濱夢神告之曰白水出而東走母明視而見白水出焉告其鄰居而走顧望其邑咸爲水矣其母化爲空桑子在其中矣莘女取而獻之命養于庖長而有賢德殷以爲尹曰伊尹也

又東北過新城縣南

馬懷橋長水出新城西山東逕晉使持節征南將軍宋均碑南均字文平縣人也其碑太始三年十二月立其水又東流入于伊又有明水出梁縣西狼臯山俗謂之

石澗水也西北流逕楊亮壘南西北合康水亦出狼臯山東北流逕范塢北與明水合北注西南流入于伊山海經曰放臯之山明水出焉南流注于伊水是也伊水又與大戟水會出梁縣西水有二源北水出廣成澤西南逕楊志塢北與南水合水源南出廣成澤西流逕陸渾縣南河南十二縣境簿曰廣成澤在新城縣界黃阜西北流屈而東逕楊志塢南又北屈逕其塢東又逕塢北同注老倒澗俗謂之老倒澗水西流入于伊伊水又北逕新城東與吳澗水會水出縣之西山東流南屈逕其縣故城西又東轉逕其縣南故蠻子國也縣有鄆聚

今名蠻中是也漢惠帝四年置縣其水又東北流注于伊水伊水又西北逕當階城西大狂水入焉水東出陽城縣之大磬口山海經曰大磬之山多璵璠之玉其陽狂水出焉西南流注于伊水其中多三足龜人食之者無大疾可以已腫狂水又西逕綸氏縣故城南竹書紀年曰楚吾得帥師及秦伐鄭圍綸氏者也左與倚薄山水合水北出倚薄之山南逕黃城西又南逕綸氏縣故城東而南流注于狂水狂水又西入風谿水注之水北出八風山南流逕綸氏縣故城西西南流入于狂水狂水又西得三交水口水有三源各導一谿竝出山南流

合舍故世有三交之名也

一清按寰宇記潁陽縣下引水經注云三交水石上菖蒲一寸九節為藥最妙服久化仙校勘云按水經洛水注有三交水不見石菖蒲事恐近世水經本有脫遺耳

其水西南流注于狂水狂水又西逕岳高山北西南與湮水合水出東北湮谷西南流逕武林亭東北又屈逕其亭南其水又西南逕湮陽亭東蓋藉水以名亭也又東南流入于狂狂水又西逕湮陽城南又西逕當階城南而西流注于伊伊水又北土溝水出元望山西東逕元望山南又東逕新城縣故城北東流注于伊水伊水又北板橋水入焉水出西山東流入于伊水伊水又北會厭澗水水出西山東流逕邨垂亭南春秋左傳文公

十七年秋周甘斨敗戎于邠垂者也服虔曰邠垂在高都南杜預釋地曰河南新城縣北有邠垂亭司馬彪郡國志曰新城有高都城今亭在城南七里遺基猶在京相璠曰舊說言邠垂在高都南今上黨有高都縣余謂京論疎遠未足以證無如虔說之旨密矣其水又東注于伊水伊水又北逕高都城東徐廣史記音義曰今河南新城縣有高都城竹書紀年梁惠成王十七年東周與鄭高都利者也又來需之水出于半石之山西南流逕軾輪城北西歷芟澗水以其西流又謂之小狂水也其水又西南逕大石嶺南開山圖所謂大石山也山下

有大石嶺碑河南隱士通明以漢靈帝中平六年八月戊辰於山堂立碑文字淺鄙殆不可尋魏文帝獵於此山虎超乘輿孫禮拔劍投虎于是山山在洛陽南而劉澄之言在洛東北非也山阿有魏明帝高平陵王隱晉書曰惠帝使校尉陳總仲元詣洛陽山請雨總盡除小祀唯存大石而祈之七日大雨卽是山也來需之水又西南逕赤眉城南又西至高都城東西入伊水謂之曲水也

又東北過伊闕中

伊水逕前亭西左傳昭公二十二年晉箕遺樂徵右行

詭濟師取前城者也京相璠曰今洛陽西南五十里伊  
 闕外前亭矣服虔曰前讀為泉周地也伊水又北入伊  
 闕昔大禹疏以通水兩山相對望之若闕伊水歷其間  
 北流故謂之伊闕矣春秋之闕塞焉昭公二十六年趙  
 鞅使女寬守闕塞是也陸機曰洛有四闕斯其一焉東  
 巖西嶺並鐫石開軒高蒙架峯西側靈巖下泉流東注  
 入于伊水傅毅反都賦曰因龍門以暢化開伊闕以達  
 聰也闕左壁有石銘云黃初四年六月二十四日辛巳  
 大出水舉高四丈五尺齊此已下蓋記水之漲減也右  
 壁又有石銘云永康五年一清按晉惠帝永康紀元僅一年即改元為永寧此當是

元康之誤耳河南府君循大禹之軌部督郵辛曜新城令王  
 琨部監作掾董猗李褒斬岸開石平通伊闕石文尚存  
 也

又東北至洛陽縣南北入于洛

伊水自闕東北流枝津右出焉東北引漑東會合水同  
 注公路澗入于洛今無水戰國策曰東周欲為田西周  
 不下水蘇子見西周君曰今不下水所以富東周也民  
 皆種他種欲貧之不如下水以病之東周必復種稻種  
 稻而復奪之是東周受命于君矣西周遂下水即是水  
 之故渠也伊水又東北枝渠左出焉水積成湖北流注

于洛今無水伊水又東北至洛陽縣南逕園丘東大魏郊天之所準漢故事建之後漢書郊祀志曰建武二年初制郊兆于洛陽城南七里爲園壇八陛中又爲重壇天地位其上皆南向其外壇上爲五帝位其外爲壇重營皆紫以像紫宮按禮天子大裘而冕祭昊天上帝於此今衮冕也壇壇無復紫矣伊水又東北流注于洛水廣志曰鯢魚聲如小兒唬有四足形如鱧可以治牛出伊水也司馬遷謂之人魚故其著史記曰始皇帝之葬也以人魚膏爲燭徐廣曰人魚似鮎而四足卽鯢魚也瀍水出河南穀城縣北山

縣北有潛亭瀍水出其北梓澤中梓澤地名也澤北對原阜卽裴氏墓塋所在碑闕存焉其水歷澤東南流水西有一原其上平敞古潛亭之處也卽潘安仁西征賦所謂越街郵者也

### 東與千金渠合

周書曰我卜瀍水西謂是水也東南流水西南有帛仲理墓墓前有碑題云真人帛君之表仲理名護益州巴郡人晉永寧二年十一月立瀍水又東南流注于穀穀水自千金塢東注謂之千金渠也

又東過洛陽縣南又東過偃師縣又東入于洛

澗水出新安縣南白石山

山海經曰白石之山惠水出于其陽東南注于洛澗水出於其陰北流注于穀世謂是山曰廣陽山水曰赤岸水亦曰石子澗地理志曰澗水出新安縣東南東入洛是爲密矣東北流歷函谷東坂東謂之八特坂摯仲治三輔決錄注云馬氏兄弟五人共居澗穀二水之交作五門客因舍以爲名今在河南西四十里以山海經推校里數不殊仲治所記水會尚有故居處斯則澗水也卽周書所謂我卜澗水東言是水者也

東南入于洛

孔安國曰澗水出鼃池山今新安縣西北有一水北出鼃池界東南流逕新安縣而東南流入于穀水安國所言當斯水也然穀水出鼃池下合澗水得其通稱或亦指之爲澗水也竝未詳之耳今孝水東十里有水世謂之慈澗又謂之澗水按山海經則少水也而非澗水蓋習俗之誤耳又按河南有離山水謂之爲澗水水西北出離山東南流注于澗水也又東南流歷邾山於穀城東而南流注于穀舊與穀水亂流同南入于洛今穀水東入千金渠澗水與之俱東入洛矣或以是水竝爲周公之所相卜也呂忱曰今河南死水疑其是卽此水也



然意所未詳故竝書存之耳

水經注釋卷十五終

水經注釋卷十六

仁和趙一清誠夫錄

穀水

甘水

漆水

澆水

澶水

補洛水

穀水出宏農黽池縣南墦冢林穀陽谷

山海經曰傅山之西有林焉曰墦冢穀水出焉東流注

於洛其中多珣玉今穀水出於峭東馬頭山穀陽谷東

北流歷黽池川本中鄉地也漢景帝三年

一清按漢志是景帝中二

年初城徙萬戶為縣因峭黽之池以目縣焉亦或謂之

彭池故徐廣史記音義曰黽或作彭穀水出處也穀水

又東逕秦趙二城南司馬彪續漢書曰赤眉從黽池自利陽南欲赴宜陽者也世謂之俱利城者彥曰昔秦趙之會各據一城秦王使趙王鼓瑟藺相如今秦王擊缶處也馮異又破赤眉于是川矣故光武璽書曰始雖垂翅回溪終能奮翼黽池可謂失之東隅收之桑榆矣穀水又東逕土嶠北所謂三嶠也穀水又東左會北溪溪水北出黽池山東南流注於穀疑卽孔安國所謂澗水也穀水又東逕新安縣故城南北夾流而西接嶠黽昔項羽西入秦坑降卒二十萬于此國滅身亡宜矣穀水又東逕千秋亭南其亭纍石爲垣世謂之城也潘岳西

征賦曰亭有千秋之號子無七旬之期謂是亭也又東逕雍谷溪回岫縈紆石路阻峽故亦有峽石之稱矣嶠水歷側左與北川水合水有二源竝導北山東南流合成一水自乾注巽入於穀穀水又東逕缺門山山阜之不接者里餘故得是名矣二壁爭高斗聳相亂西瞻雙阜右望如砥穀水自缺門而東廣陽川水注之水出廣陽北山東南流注於穀南望微山雲峯相亂穀水又逕白超壘南戴延之西征記云次至白超壘去函谷十五里築壘當大道左右有山澹至相去百餘步從中出北乃故關城非所謂白超壘也是壘在缺門東一十五里

壘側舊有塢故治官所在魏晉之日引穀水為水治以經國用遺迹尚有穀水又東石默溪水出微山東麓石默溪東北流入於穀穀水又東宋水北流注於穀穀水

又東逕魏將作大匠母邱興盛

一清按魏書母邱儉傳及裴松之注引魏名臣

奏議張既表俱作母邱興無盛字

墓南二碑存焉儉父也管輅別傳曰

輅嘗隨軍西征過其墓而歎謂士友曰元武藏頭青龍無足白虎銜尸朱雀悲哭四危已備法應滅族果如其

言穀水又東逕函谷關南東北流阜澗水注之水出新

安縣東南流逕母邱興盛墓東又南逕函谷關西關高

嶮峽路出屢郭漢元鼎三年樓船將軍楊僕數有大功

恥居關外請以家僮七百人築塞徙關于新安即此處

也昔郭丹西入關感慨于其下曰不乘駟馬高車終不

出此關也去家十二年果如志焉阜澗水又東流入於

穀穀水又東北逕函谷關城東右合桑爽之水

一清按山經桑

爽二字不相連屬此是善長誤證

山海經曰白石山西五十里曰穀山

其上多穀其下多桑爽水出焉世謂之紵麻澗

一清按此句是

善長所增加非山經原文下百荅水句同

北流注於穀其中多碧綠穀水又

東澗水注之山海經曰婁涿山西四十里曰白石之山

澗水出焉北流注於穀自下通謂澗水為穀水之兼稱

焉故尚書曰伊洛瀍澗既入於河而無穀水之目是名

亦通稱矣劉澄之云新安有澗水源出縣北又有澗水  
 未知其源余考諸地記竝無澗水但澗澗字相似時有  
 字錯為澗也故闕駟地理志曰禹貢之澗水是以知傳  
 寫書誤字繆舛真澄之不思所致耳既無斯水何源之  
 可求乎穀水又東波水注之山海經曰瞻諸山西三十  
 里曰婁涿之山無草木多金玉波水出於其陰世謂之  
 百荅水北流注於穀其中多菑石文石穀水又東少水  
 注之山海經曰廆山西三十里曰瞻諸之山其陽多金  
 其陰多文石少水出於其陰控引衆溪積以成川一清按八  
 字亦是善長所增加東流注於穀世謂之慈澗也穀水又東俞隨

之水注之山海經曰平蓬山西十里曰廆山其陽多璵

琤之玉俞隨之水出於其陰北流注於穀世謂之孝水

也潘岳西征賦曰澡孝水以濯纓嘉美名之在茲一清按五

臣注文選曰澡水經注作濟可見唐時官本原是濟字古隸齊作舛形與臬似故濟澡互異耳是水在

河南城西十餘里故呂忱曰孝水在河南而戴延之言

在函谷關西劉澄之又云出檀山檀山在宜陽縣西在

穀水南無南入之理考尋茲說當承緣生述征繆誌耳

緣生從戍行旅征途訊訪既非舊土故無所究今川瀾

北注澄映泥濘何得言枯涸也皆為疏僻矣

東北過穀城縣北

城西臨穀水故縣取名焉穀水又東逕穀城南不歷其北又東逕河南王城西洛水枝流入焉今無水也

又東過河南縣北東南入於洛

河南王城西北穀水之右有石磧磧南出為死穀北出

為湖溝魏太和七年暴水流高三丈

一清按魏書明帝太和四年九月大雨伊洛河漢溢流晉宋五行志並同無七年暴水事下

云太和五年于九龍渠上立千金塢修張王故績則四年伊洛暴水為此七年當因下晉泰始七年大水暴出而誤也胡肅明曰按曹魏明帝元魏孝文皆有太和年號明帝之太和終於六年故方輿紀要謂穀水入瀍經王城北自元魏時始瀍水出穀城山東南流至王城東北而南入洛周靈王壅穀使東注勢必與之合韋昭云穀在王城之北東入瀍是也其元魏所決者磧北之湖水耳瀍瀍之合此地下滯流以成湖渚造溝以通水不自元魏始也

東西十里決湖以注瀍水穀水又逕河南王城北所謂

成周矣公羊曰成周者何東周也何休曰名為成周者

周道始成王所都也地理志曰河南河南縣故邾鄆地

也京相璠曰邾山名鄆地邑也卜年定鼎為王之東都

謂之新邑是為王城其城東南名曰鼎門蓋九鼎所從

入也故謂是地為鼎中楚子伐陸渾之戎問鼎于此述

征記曰穀洛二水本于王城東北合流所謂穀洛鬪也

今城之東南缺千步世又謂之穀洛鬪處俱為非也余

按史傳周靈王之時穀洛二水鬪毀王宮王將塌之太

子晉諫王不聽遺堰三堤尚存左傳襄公二十五年齊

人城邾穆叔如周賀韋昭曰洛水在王城南穀水在王城北東入于瀍至靈王時穀水盛出于王城西而南流合于洛兩水相格有似于鬪而毀王城西南也潁容之著春秋條例言西城梁門枯水處世謂之死穀是也始知緣生行中造次入關經究故事與實違矣考王封周桓公於是為西周及其孫惠公封少子于鞏為東周故有東西之名矣秦滅周以為三川郡全氏曰按秦本紀滅韓已置三川郡及滅周以其地并入三川耳善長所言未覈項羽封申陽為河南王漢以為河南郡王莽又名之曰保忠信鄉一清按漢書三輔為六都尉河東河內宏農河南潁川南陽為六隊郡置大夫職如太守屬正職如都尉更名河南大尹曰

保忠信鄉益河南屬縣滿三十置六郊州長各一人人主五縣及他官名悉改大郡至分為五郡縣以亭為名者三百六十以應符命也是莽所改是官名非地名且莽方營建東都恢宏其制豈肯改郡曰鄉鄉字是卿字之誤地理志作鄉字道元又引之其由來舊矣先武都洛陽以為尹尹正也所以董正京畿率先百郡也穀水又東流逕乾祭門北子

朝之亂晉所開也

全氏曰按晉未嘗開門是誤讀左傳而妄言之者

東至千金

場河南十二縣境簿曰河南縣城東十五里有千金場

洛陽記曰千金場舊堰穀水魏時更修此堰謂之千金

場積石為場而開溝渠五所謂之五龍渠渠上立場場

之東首立一石人石人腹上刻勒云太和五年二月八

日庚戌造築此場更開溝渠此水衝渠止其水助其堅

也必經年歷世是故部立石人以記之云爾蓋魏文帝

修王張故績也

何氏曰亭林云文當作明全氏曰太和是明帝年號亭林之言是也王即王梁

張即張純

塌是都水使者陳協所造也語林曰陳協數進阮

步兵洒後晉文王欲修九龍堰阮舉協文王用之掘地

得古承水銅龍六枚堰遂成水歷塌東注謂之千金渠

逮於晉世大水暴注溝瀆泄壞又廣功焉石人東脇下

文云太始七年六月二十三日大水迸瀑出常流上三丈

蕩壞二塌五龍泄水南注瀉下加歲久激齧每澇即壞

歷載捐棄大功故為今塌更於西開泄名曰代龍渠地

形正平誠得瀉泄至理千金不與水勢激爭無緣當壞

由其卑下水得踰上激齧故也今增高千金於舊一丈

四尺五龍自然必歷世無患若五龍歲久復壞可轉於

西更開二塌二渠合用二十三萬五千六百九十八功

以其年十月二十三日起作功重人少到八年四月二

十日畢代龍渠即九龍渠也

全氏曰按五龍渠與九龍渠不同五龍渠即千金渠

若九龍渠作于魏明帝青龍三年是時崇華殿災郡國九龍見明帝因更營九龍殿引穀水為九龍池而築渠

以堰之善長誤矣

後張方入洛破千金塌京師水碓皆涸永嘉

初汝陰太守李矩汝南太守袁孚修之以利漕運公私

賴之水積年

一清按此處有脫文

渠塌頽毀石砌殆盡遺基見存

朝廷太和中修復故塌按千金塌石人西脇下文云若

溝渠久疏深引水者當於河南城北石磧西更開渠北  
 出使首狐邱故溝東下因故易就磧堅便時事業已訖  
 然後見之加邊方多事人力苦少又渠場新成未患於  
 水是以不敢預修通之若於後當復興功者宜就西磧  
 故書之於石以遺後賢矣雖石磧淪敗故跡可憑準之  
 於文穀水北引渠東合舊瀆舊瀆又東晉惠帝造石梁  
 於水上按橋西門之南頰文稱晉元康二年十一月二  
 十日改治石巷水門除豎枋更爲函枋立作覆枋屋前  
 後辟級續石障使南北入岸築治漱處破石以爲殺矣  
 到三年三月十五日畢訖并記列門廣長深淺於左右

巷東西長七尺南北龍尾廣十二丈巷瀆口高三丈謂  
 之舉門橋潘岳西征賦曰秣馬舉門卽此處也穀水又  
 東又結石梁跨水制城西梁也穀水又東左會金谷水  
 水出大白原東南流歷金谷謂之金谷水東南流逕晉  
 衛尉卿石崇之故居也石季倫金谷詩集敘曰余以元

康七年從太僕出爲征虜將軍有別廬在河南界金谷

澗中有清泉茂樹衆果竹柏藥草蔽翳

朱氏諱璋箋曰此下宋本至今

俱脫錯一清按此處失去一葉無從補正中尉雖引季  
 倫詩敘以補其缺軼而與下西北角之文終不屬也金  
 谷敘爲善長所裁取西北角築之謂之金墉城魏文帝  
 已非其舊故不錄

起層樓于東北隅

寰宇記西京洛陽縣下云金墉城在故城西北角魏明帝所築也洛陽地



圖云金墉城內有百尺樓一清按西北角之上當是敘洛陽故城今本失之又城為魏明帝築則層樓不應云文帝起也蓋亦明帝之誤文 晉宮閣名曰金墉有崇天堂即此地上

架木為榭故曰樓矣皇居創徙宮極未就止蹕于此構霄榭于故臺所謂臺以停停也南曰乾光門夾建兩觀觀下列朱桁于塹以為御路東曰含春門北有邏門城上西面列觀五十步一睥睨屋臺置一鐘以和漏鼓西北連廡函蔭墉北廣榭炎夏之日高祖常以避暑為淥水池一所在金墉者也穀水逕洛陽小城北因阿舊城憑結金墉故向城也永嘉之亂結以為壘號洛陽壘故洛陽記曰陵雲臺西有金市金市北對洛陽壘者也又東

歷大夏門下故夏門也陸機與弟書云門有三層高百尺魏明帝造門內東側際城有魏文帝所起景陽山餘基尚存孫盛魏春秋曰黃初元年文帝愈崇宮殿雕飾觀閣取白石英及紫石英及五色大石於太行穀城之山起景陽山于芳林園樹松竹草木捕禽獸以充其中于是百役繁興帝躬自掘土率羣臣三公已下莫不展力全氏曰按孫盛之記事疎矣此乃明帝景初元年之事楊阜高堂隆交章爭之者也山之東舊有九江陸機洛陽記曰九江直作員水水中作員壇三破之夾水得相逕通賦曰濯龍芳林九谷入溪芙蓉覆水秋蘭被崖今也山則塊阜獨立江無復髣髴矣渠水

又東枝分南入華林園歷疏圃南圃中有古玉井井悉以珉玉爲之以緇石一清按北堂書鈔引注作績石爲口工作精密猶

不變古瓌焉如新又逕瑤華宮南歷景陽山北山在都

亭堂上結方湖湖中起御坐石也御坐前建蓬萊山曲

池接筵飛沼拂席南面射侯夾席武峙背山堂上則石

路崎嶇巖嶂峻嶮雲臺風觀纓帶阜遊觀者升降阿

閣出入虹陛望之狀鳧沒鸞舉矣其中引水飛翠傾瀾

瀑布或枉渚聲溜潺潺不斷竹柏蔭于層石繡薄叢于

泉側微颺暫拂則芳溢于六空實爲神居矣其水東注

天淵池池中有魏文帝九華臺殿基悉是洛中故碑累

之今造釣臺于其上池南直魏文帝茅茨堂前有茅茨

碑是黃初中所立也羊氏銜之洛陽伽藍記曰華林南

苗茨之碑高祖于碑北作苗茨堂永安中莊帝馬射于

華林園百官皆來讀碑疑苗字誤國子博士李同軌曰

魏明帝英才世稱三祖公幹仲宣爲其羽翼但未知本

意如何不得言誤也銜之時爲奉朝請因卽釋曰以蒿

覆之故曰苗茨何誤之有衆咸稱善以爲得其旨歸陳

氏耀文天中記曰銜之魏人親釋苗茨之義道元謂黃

初所立誤矣一清按天淵池黃初五年所穿九華臺黃

初七年所築或茅茨堂亦丕所建特其碑是獻所立未

可知也又李同軌以公幹仲宣羽翼明帝亦未

淵池東出華林園逕聽訟觀南故平望觀也魏明帝常

言獄天下之命也每斷大獄恒幸觀聽之以太和三年

更從今名觀西北接華林隸簿昔劉楨磨石處也文士

傳曰文帝之在東宮也宴諸文學酒酣命甄后拜坐坐者咸伏唯劉楨平仰觀之太祖以爲不敬送徒隸簿後太祖乘步牽車乘城降觀簿作諸徒咸敬而楨掘坐磨石不動太祖曰此非劉楨也石如何性楨曰石出荆山元巖之下外炳五色之章內秉堅貞之志雕之不增文磨之不加瑩稟氣真正稟性自然太祖曰名豈虛哉復爲文學池水又東流於洛陽縣之南池池卽故翟泉也南北百一十步東西七十步皇甫謐曰悼王葬景王于翟泉今洛陽太倉中大家是也春秋定公元年晉魏獻子合諸侯之大夫于翟泉始盟城周班固服虔皇甫謐

咸陽翟泉在洛陽東北周之墓地今按周威烈王葬洛陽城內東北隅景王家在洛陽太倉中翟泉在兩冢之間側廣莫門道東建春門路北路卽東宮街也于洛陽爲東北後秦封呂不韋爲洛陽十萬戶侯大其城并得景王家矣是其墓地也及晉永嘉元年洛陽東北步廣里地陷有二鷺出蒼色者飛翔冲天白色者止焉陳畱孝廉董養曰步廣周之翟泉盟會之地今色蒼胡象矣其可盡言乎後五年劉曜王彌入洛帝居平陽陸機洛陽記曰步廣里在洛陽城內宮東是翟泉所在不得于太倉西南也京相璠與裴司空彥季修晉輿地圖作春秋

土地名亦言今太倉西南池水名翟泉又曰舊說言翟泉本自在洛陽北萇宏城周乃繞之杜預因其一證謂必是翟泉而卽實非也後遂爲東宮池晉中州記曰惠帝爲太子出聞蝦蟇聲問人爲是官蝦蟇私蝦蟇侍臣賈允對曰在官地爲官蝦蟇在私地爲私蝦蟇令曰若官蝦蟇可給廩先是有讖云蝦蟇當貴昔晉朝收愍懷太子于後池卽是池也其一水自大夏門東逕宣武觀憑城結構不更增墉左右夾列步廊參差翼跂南望天淵池北矚宣武場竹林七賢論曰王戎幼而清秀魏明帝于宣武場上爲欄苞虎阱使力士袒裼迭與之搏縱

百姓觀之戎年七歲亦往觀焉虎乘閒薄欄而吼其聲震地觀者無不辟易顛仆戎亭然不動帝于門上見之使問姓名而異之場西故賈充宅地穀水又東逕廣莫門北漢之穀門也北對芒阜連嶺修互苞惣衆山始自洛口西踰平陰悉芒壟也魏志曰明帝欲平北芒令登臺見孟津侍中辛毗諫曰若九河溢涌洪水爲害邱陵皆夷何以禦之帝乃止穀水又東出屈南逕建春門石橋下卽上東門也阮嗣宗詠懷詩曰步出上東門者也一曰上升門晉曰建陽門百官志曰洛陽十二門候一人六百石東觀漢記曰郅惲爲上東門候光武嘗出夜

還詔開門欲入憚不內上令從門閒識面憚曰火明遼遠遂拒不開由是上益重之亦袁本初挂節處也橋首建兩石柱橋之右柱銘云陽嘉四年乙酉壬申詔書以城下漕渠東通河濟南引江淮方貢委輸所由而至使中謁者魏郡清淵馬憲監作石橋梁柱敦敕工匠盡要妙之巧攢立重石累高周距橋工路博流通萬里云云

河南尹邳崇隗

一清按河南尹官也邳郡望也崇隗人姓名也漢志魯國薛縣下云夏車正奚

仲所國後遷于邳又東海郡下邳縣臣瓚云有上邳故曰下邳也王子侯表呂后三年封楚元王子邳客為上邳侯即薛也續志註云臨淮郡永平十五年更為下邳國此單稱邳銘勒于陽嘉年其為下邳無疑也

勃海重合雙福水曹掾中牟任防史王蔭史趙興將作

吏睢陽申翔道橋掾成羣卑國洛陽令江雙丞平陽降

監掾王騰之主石作右北平山仲三月起作八月畢成

其水依柱文自樂里道屈而東出陽渠昔陸機為成都

王穎入洛敗北而返水南即馬市也舊洛陽有三市斯

其一也亦嵇叔夜為司馬昭所害處也北則白社故里

也昔孫子荆會董威輦于白社謂此矣以同載為榮故

有威輦圖又東逕馬市石橋橋南有二石柱竝無文刻

也漢司空漁陽王梁之為河南也將引穀水以溉京都

渠成而水不流故以坐免後張純堰洛以通漕洛中公

私穰贍是渠今引穀水蓋純之創也按陸機洛陽記劉

澄之永初記言城之西面有陽渠周公制之也昔周遷殷民于洛邑城隍偏狹卑陋之所耳晉故城成周以居敬王秦又廣之以封不韋以是推之非專周公可知矣亦謂之九曲瀆河南十二縣境簿云九曲瀆在河南鞏縣西西至洛陽又按傅暢晉書云都水使者陳狼鑿運渠從洛口入注九曲至東陽門是以阮嗣宗詠懷詩所謂朝出上東門遙望首陽岑又言遙遙九曲閒徘徊欲何之者也陽渠水南暨閭闔門漢之上西門者也漢宮記曰上西門所以不純白者漢家厄于戍故以丹鏤之太和遷都徙門南側其水北乘高渠枝分上下歷故石

橋東入城逕望先寺中有碑碑側法子丹碑作龍距勢於今作則佳方古猶劣渠水又東歷故金市南直千秋門古宮門也又枝流入石逗伏流注靈芝九龍池魏太和中皇都遷洛陽經構宮極修理街渠務窮幽隱發石視之曾無毀壞又石工細密非今之所擬亦奇爲精至也遂因用之其一水自千秋門南流逕神虎門下東對雲龍門二門衡楸之上皆刻雲龍風虎之狀以火齊薄之及其晨光初起夕景斜輝霜文翠照陸離眩目又南逕通門掖門西又南流東轉逕閭闔門南按禮王有五門謂臯門庫門雉門應門路門路門一日畢門亦曰虎

門也魏明帝上法太極于洛陽南宮起太極殿于漢崇德殿之故處改雉門爲閭闔門昔在漢世洛陽宮殿門題多是大篆言是蔡邕諸子自董卓焚宮殿魏太祖平荊州漢吏部尚書安定梁孟皇善師宜官八分體求以贖死太祖善其法常仰繫帳中愛翫之以爲勝宜官北宮榜題咸是鵠筆南宮旣建明帝令侍中京兆韋誕以古篆書之皇都遷洛始令中書舍人沈含馨以隸書書之景明正始之年又敕符節令江式以大篆易之今諸桁榜題皆是式書周官太宰以正月懸治法于象魏廣雅曰闕謂之象魏風俗通曰魯昭公設兩觀于門是謂

之闕從門厥聲爾雅曰觀謂之闕說文曰闕門觀也漢官典職曰偃師去洛四十五里望朱雀闕其上鬱然與天連是明峻極矣洛陽故宮名有朱雀闕白虎闕蒼龍闕北闕南宮闕也東觀漢記曰更始發洛陽李松奉引車馬奔觸北闕鐵柱門三馬皆死卽斯闕也白虎通曰門必有闕者何闕者所以飾門別尊卑也今閭闔門外夾建巨闕以應天宿雖不如禮猶象而魏之上加復思以易觀矣廣雅曰復思謂之屏釋名曰屏自障屏也學思在門外學復也臣將入請事于此復重思之也漢末兵起壞園陵學思曰無使民復思漢也故鹽鐵論曰垣

闕學思言樹屏隅角所架也穎容又曰闕者上有所失  
 下得書之于闕所以求論譽于人故謂之闕矣今闕前  
 水南道右置登聞鼓以納諫也昔黃帝立明堂之議堯  
 有衢室之間舜有告善之旌禹有立鼓之訊湯有總街  
 之誹武王有靈臺之復皆所以廣設過誤之備也渠水  
 又枝分夾路南出逕太尉司徒兩坊間謂之銅駝街舊  
 魏明帝置銅駝諸獸于閭闔南街陸機云駝高九尺即  
 出太尉坊者也水西有永寧寺熙平中始創也作九層  
 浮圖一清按魏書藝術傳永寧寺九層浮圖郭安興為匠浮圖下基方一十四丈  
 自金露枓下至地四十九丈取法代都七級一清按七級浮圖在

代都是元魏所創九層在前七級在後何云取法耶而又高廣之雖二京之盛五  
 都之富利刹靈圖未有若斯之構按釋法顯行傳西域  
 有爵離浮圖其高與此相狀東都西域俱為莊妙矣其  
 地是曹爽故宅經始之日于寺院西南隅得爽窟室下  
 入地可丈許地壁悉纍方石砌之石作細密都無所毀  
 其石悉入法用自非曹爽庸匠亦難復制此桓氏有言  
 曹子丹生此豚犢信矣渠左是魏晉故廟地今悉民居  
 無復遺墉也渠水又西歷廟社之間南注南渠廟社各  
 以物色辨方周禮廟及路寢皆如明堂而有燕寢焉惟  
 祧廟則無後代通為一廟列正室于下無復燕寢之制



禮天子建國左廟右社以石爲主祭則希冕今多王公攝事王者不親拜焉咸寧元年洛陽大風帝社樹折青氣屬天元王東渡魏社代昌矣渠水自銅駝街東逕司馬門南魏明帝始築闕崩壓殺數百人遂不復築故無闕門南屏中舊有置銅翁仲處金狄旣淪故處亦禿惟壞石存焉自此南直宣陽門經緯通達皆列馳道往來之禁一同兩漢曹子建嘗行御街犯門禁以此見薄渠水又東逕杜元凱所謂翟泉北今無水坎方九丈六尺深二丈餘似是人工而不類于泉陂是驗非之一證也又皇甫謐帝王世紀云王室定遂徙居成周小不受王

都故壞翟泉而廣之泉源旣塞明無故處是驗非之二證也杜預言翟泉在太倉西南旣言西南于雒陽不得爲東北是驗非之三證也稽之地說事幾明矣不得爲翟泉也渠水歷司空府前逕太倉南出東陽門石橋下注陽渠穀水自閭闔門而南逕土山東水西三里有坂坂上有土山漢大將軍梁冀所成築土爲山植林成苑張璠漢記曰山多峭坂以象二峭積金玉採捕禽獸以充其中有人殺苑兔者迭相尋逐死者十三人南出逕西陽門舊漢氏之西明門也亦曰雍門矣舊門在南太和中以故門邪出故徙是門東對東陽門穀水又南逕

白馬寺東昔漢明帝夢見大人金色項佩白光以問羣臣或對曰西方有神名曰佛形如陛下所夢得無是乎于是發使天竺寫致經像始以榆欂盛經白馬負圖表之中夏故以白馬爲寺名此榆欂後移在城內愍懷太子浮圖中近世復遷此寺然金光流照法輪東轉創自此矣穀水又南逕平樂觀東李九平樂觀賦曰乃設平樂之顯觀章秘偉之奇珍華嶠後漢書曰靈帝于平樂觀下起大壇上建十二重五采華蓋高十丈壇東北爲小壇復建九重華蓋高九丈列奇兵騎士數萬人天子住大蓋下禮畢天子躬擐甲稱無上將軍行陣三匝而

還設秘戲以示遠人故東京賦曰其西則有平樂都場示遠之觀龍雀蟠蜿天馬半漢應劭曰飛廉神禽能致風氣古人以良金鑄其象明帝永平五年長安迎取飛廉并銅馬置上西門外平樂觀今于上西門外無他基觀惟西明門外獨有此臺巍然廣秀疑卽平樂觀也又言皇女稚殤埋于臺側故復名之曰皇女臺晉灼曰飛廉鹿身頭如雀有角而蛇尾豹文董卓銷爲金用銅馬徙于建始殿東階下胡軍喪亂此象遂淪穀水又南逕西明門故廣陽門也門左枝渠東派入城逕太社前又東逕太廟南又東於青陽門右下注陽渠穀水又南東

屈逕津陽門南故津門也昔洛水泛洸漂害者衆津陽城門校尉將築以遏水諫議大夫陳宣止之曰王尊臣也水絕其足朝廷中興必不入矣水乃造門而退穀水又東逕宣陽門南故苑門也皇都遷洛移置于此對閭闔門南直洛水浮桁故東京賦曰沂洛背河左伊右瀍者也夫洛陽考之中土卜惟洛食實爲神也門左卽洛陽池處也池東舊平城門所在矣今塞北對洛陽南宮故蔡邕曰平城門正陽之門與宮連屬郊祀法駕所由從出門之最尊者洛陽諸宮名曰南宮有謬臺一清按周景王作謬臺尺氏切臨照臺東京賦曰其南則有謬門曲榭邪

阻城洫注云謬門冰室門也阻依也洫城下池也皆屈曲邪行依城池爲道故說文曰隍城池也有水曰池無水曰隍矣謬門卽宣陽門也門內有宣陽冰室周禮有冰人日在北陸而藏之西陸朝覲而出之冰室舊在宣陽門內故得是名門旣擁塞冰室又罷穀水又逕靈臺北望雲物也漢光武所築高六丈方二十步世祖嘗宴于此臺得鼯鼠于臺上亦諫議大夫第五子陵之所居倫少子也一清按三輔決錄注云名頡以清正爲郡功曹洛陽無主人鄉里無田宅寄止靈臺或十日不炊司隸校尉南陽左雄尚書廬江朱孟興等皆倫故孝廉功曹各致禮餉

並辭不受永建中卒穀水又東逕平昌門南故平門也  
又逕明堂北漢光武中元元年立尋其基構上圓下方  
九室重隅十二堂蔡邕月令章句同之故引水于其下  
爲辟雍也穀水又東逕開陽門南晉宮閣名曰故建陽  
門也漢官曰開陽門始成未有名宿昔有一柱來在樓  
上琅琊開陽縣上言南城門一柱飛去光武皇帝使來  
識視良是遂堅縛之因刻記年月日以名焉何湯仲弓  
嘗爲門候上微行夜還湯閉門不內朝廷嘉之又東逕  
國子太學石經北周禮有國學教成均之法學記曰古  
者家有塾黨有庠遂有序國有學亦有虞氏之上庠下

庠夏后氏之東序西序殷人之左學右學周人之東膠  
虞庠王制曰養國老于上庠養庶老于下庠故有大學  
小學教國之子弟焉謂之國子漢魏以來置大學于國  
子堂東漢靈帝光和六年刻石鏤碑載五經立于大學  
講堂前悉在東側蔡邕以熹平四年與五官中郎將堂  
谿典光祿大夫楊賜諫議大夫馬日磾議郎張馴韓說  
太史令單颺等奏求正定六經文字靈帝許之邕乃自  
書丹于碑使工鐫刻立于大學門外于是後儒晚學咸  
取正焉及碑始立其觀視及筆寫者車乘日千餘兩填  
塞街陌矣今碑上悉銘刻蔡邕等名魏正始中又立古

篆隸三字石經古文出于黃帝之世倉頡本鳥跡為字取其孳乳相生故文字有六義焉自秦用篆書焚燒先典古文絕矣魯恭王得孔子宅書不知有古文謂之科斗書蓋因科斗之名遂效其形耳言大篆出于周宣之時史籀創著平王東遷文字乖錯秦之李斯及胡毋敬又改籀書謂之小篆故有大篆小篆焉然許氏字說專釋于篆而不本古文言古隸之書起于秦代而篆字文繁無會劇務故用隸人之省謂之隸書或云即程邈于雲陽增損者是言隸者篆捷也孫暢之嘗見青州刺史傅宏仁說臨淄人發古冢得桐棺前和外隱起為隸字

言齊太公六世孫胡公之棺也唯三字是古餘同今書證知隸自出古非始于秦魏初傳古文出邯鄲淳石經古文轉失淳法樹之于堂西石長八尺廣四尺列石于其下碑石四十八枚廣三十丈魏文帝又刊典論六碑

附于其次隸釋石經殘碑曰水經光和六年立石于太

三字石經蓋諸儒受詔在熹平而碑成則光和年也隋志有一字石經七種三字石經三種其論云漢鑄七經

皆蔡邕書又云魏立一字石經其說自相矛盾新舊唐志有今字石經七種而注論語云蔡邕作又有三字石

經古篆兩種蓋唐史以隸為今字也觀遺經字畫之妙非蔡中郎輩不能為以黃初後來碑刻比之相去不啻

霄壤豈魏人筆力可到當以水經為據三體者乃魏人所刻儒林傳云為古文篆隸三體者非也又隸續三體

石經左傳遺字曰石經見于范史帝紀及儒林宦者傳皆曰五經蔡邕張馴傳則曰六經惟儒林傳云為古文

篆隸三體書法酈氏水經云漢立石經于太學魏正始中又刻古文篆隸三字石經唐志有石經古篆兩種曰尚書曰左傳獨隋志所書異同其目有一字石經七種三字石經三種既以七經為蔡邕書矣又云魏立一字石經乃其誤也范蔚宗時三體石經與熹平所鑄並列于學宮故史筆誤書其事後人襲其譌錯或不見石刻無以考正趙氏雖以一字為中郎所書而未嘗見三體者歐陽氏以三體為漢碑而未嘗見一字者近世方勺作泊宅編載其弟甸所跋石經亦為范史隋志所惑指三體為漢字至公羊碑有馬日碑等乃云魏世用其所正定之本因存其名可為謬論一清按景伯據水經之事實辨後漢書隋志之牴牾定一字為漢刻三字為魏碑其言簡而核他說紛紜不足錄也吾杭杭編修世駿撰石經考異蒼萃羣籍足補亭林顧氏之缺四明全庶常祖望更增廣之搜剔益無遺漏石經之陳迹一旦顯于千百年之後也又按酈氏之言亦非也據陳壽三國志魏志明帝紀太和四年春二月戊子詔太傅三公以文帝典論刊石立于廟門之外不云于太學也搜神記乃云詔刊石于廟門之外及太學裴世期曰昔從征西至洛陽歷觀舊物見典論石經在太學者尚存而

廟門外無之問諸長老云晉初受禪即用魏廟移此石于太學非兩處立也竊謂此言不然蓋以搜神記所云為非也蓋石經立于太學典論自在廟門之外道元以晉移為魏立恐不如世期目覩耳聞之較實也又三少帝紀注引搜神記以典論為魏明帝立詔三公曰先帝昔著典論不朽之格言其刊石于廟門之外及太學與石經並以永示萬世至齊王紹位之初西域獻火浣布子桓夙謂不然于是刊滅此論而天下笑之今云文帝刊附亦陸機言太學贊別一碑在講堂西下列石龜碑誤也

載蔡邕韓說堂谿典等名太學弟子贊復一碑在外門

中今二碑並無石經東有一碑是漢順帝陽嘉元年立

碑文云建武二十七年造太學年積毀壞永建六年九

月詔書修太學刻石記年用工作徒十一萬二千人陽

嘉元年八月作畢碑南面刻頌表裏鏤字猶存不破漢

石經北有晉辟雍行禮碑是太始二年立其碑中折但  
世代不同物不停故石經淪缺存半毀幾駕言永久諒  
用憮焉考古有三雍之文今靈臺太學並無辟雍處晉  
永嘉中王彌劉曜入洛焚毀二學尚髣髴前基矣穀水  
於城東南隅枝分北注逕青陽門東故清明門也亦曰  
稅門也亦曰芒門又北逕東陽門東故中東門也又北  
逕故太倉西洛陽地記曰大城東有太倉倉下運船常  
有千計卽是處也又北入洛陽溝穀水又東左迤爲池  
又東右出爲方湖東西一百九十步南北七十步故水  
衡署之所在也穀水又東南轉屈而東注謂之阮曲云

阮嗣宗之故居也穀水又東注鴻池陂百官志曰鴻池  
池名也在洛陽東二十里丞一人二百石池東西千步  
南北千一百步四周有塘池中又有東西橫塘水溜逕  
通故李尤鴻池陂銘曰鴻澤之陂聖王所規開源東注  
出自城池也其水又東左合七里澗晉後略曰成都王  
穎使吳人陸機爲前鋒都督伐京師輕進爲洛軍所乘  
大敗于鹿苑人相登躡死于塹中及七里澗澗爲之滿  
卽是澗也澗有石梁卽旅人橋也昔孫登不欲久居洛  
陽知楊氏榮不保終思欲遜迹林鄉隱淪矣死楊駿埋  
之于此橋之東駿後尋亡矣搜神記曰太康末京洛始

為折楊之歌有兵革辛苦之辭駿後被誅太后幽死折  
 楊為之應也凡是數橋皆累石為之亦高壯矣制作甚  
 佳雖以時往損功而不廢行旅朱超石與兄書云橋去  
 洛陽宮六七里悉用大石下員以通水可受大舫過也  
 奇制作題其上云太康三年十一月初就功日用七萬  
 五千人至四月末止此橋經破落復更修補今無復文  
 字陽渠水又東流逕漢廣野君酈食其廟南廟在北山  
 上成公綏所謂偃師西山也山上舊基尚存廟宇東面  
 門有兩石人對倚北石人胸前銘云門亭長石人西有  
 二石闕雖經頽毀猶高丈餘闕西即廟故基也基前有

碑文字剝缺不復可識子安仰澄芬于萬古讚清徽于

廟像文字

一清按朱氏謀瑋箋曰文字下有脫誤當是載字謂成公子安集中有酈生廟碑文也未

知然否姑存之

厥集矣陽渠水又東逕亳殷南昔盤庚所遷改

商曰殷此始也班固曰尸鄉故殷湯所都者也故亦曰

湯亭薛瓚漢書注皇甫謐帝王世紀並以爲非以爲帝

嚳都矣晉太康記地道記並言田橫死于是亭故改曰

尸鄉非也余按司馬彪郡國志以爲春秋之尸氏也其

澤野負原夾郭多墳壠焉即陸士衡會王輔嗣處也袁

氏王陸詩敘機初入洛次河南之偃師時忽結陰望道

左若有民居者因往逗宿見一少年姿神端遠與機言



元機服其能而無以酬折前至一辨文機題緯古今綜  
 檢名實此少年不甚欣解將曉去稅駕逆旅嫗曰君何  
 宿而來自東數十里無村落止有山陽王家墓機乃怪  
 悵還睇昨路空野昏霾雲攢蔽日知所遇者審王弼也  
 此山即祝雞翁之故居也搜神記曰祝雞翁者洛陽人  
 也居尸鄉北山下養雞百年餘雞至千餘頭皆有名字  
 欲取呼之名則種別而至後之吳山莫知所去矣全氏曰此  
 下不敘陽渠水入穀之處疑有脫文且原流分合多有  
 錯誤無從攷正一清按洛水篇經云又東至偃師城南  
注云洛水又北陽渠水注之則陽渠水于偃師城南  
穀入洛寰宇記引輿地志云洛陽城外四面有陽渠水  
即周公所置也上源注函谷東流注城西北角仍分  
流繞城至建春門外合流又折而東注于池是也  
 穀

水又東逕偃師城南皇甫謐曰帝嚳作都于亳偃師是

也王莽之所謂師氏者也穀水又東流注於洛水矣禹貢

錐指曰穀水有二道一在洛陽城北自臯門橋屈南逕  
 建春門下蓋即王梁之所引道元所謂舊瀆者也一在  
 洛陽城南自閭闔門屈東歷開陽門又東逕偃師城南  
 又東注于洛即張純所穿此皆周靈王壅穀洛後歷代  
 遞遷之水道  
 非禹迹也

甘水出宏農宜陽縣鹿蹠山

山在河南陸渾縣故城西北俗謂之縱山水之所導發  
 于山曲之中故世人目其所為甘掌焉

東北至河南縣南北入洛

甘水發源東北流北屈逕一故城東在非山上世謂之

石城也京相璠曰或云甘水西山上夷汙而平有故甘城在河南城西二十五里指謂是城也余按甘水東一卡許里洛城南有故甘城焉北對河南故城世謂之鑿洛城鑿甘聲相近即故甘城也為王子帶之故邑矣是以昭叔有甘公之稱焉全氏曰按王子帶稱太叔死後稱甘昭公不稱昭叔甘水又與非山水會水出非山東谷東流入于甘水甘水又于河南城西北入洛經言縣南非也故京相璠曰今河南河南縣西南有甘水一清按杜元凱謂之甘泉北入洛斯得之矣漆水出扶風杜陽縣俞山東北入於渭

山海經曰踰次之山漆水出焉北流注於渭蓋自北而

南矣尚書禹貢太史公禹本紀云導渭水東北至涇又東逕漆沮入於河孔安國曰漆沮二水名亦曰洛水也出馮翊北周太王去邠度漆踰梁山止岐下故詩云民之初生自土沮漆又曰率西水滸至於岐下是符禹貢本紀之說許慎說文稱漆水出右扶風杜陽縣岐山東入渭從水泰聲又云一曰漆城池也潘岳關中記曰關中有涇渭灃澹鄠鄠漆沮之水鄠鄠漆沮四水在長安西南鄠縣皆注鄠鄠水北注渭開山圖曰麗山西北有溫池溫池西南八十里岐山在杜陽北長安西有渠謂之柴渠班固地理志云漆水出漆縣西闕駟十三州志

又云漆水出漆縣西北至岐山東入渭今有水出杜陽  
 縣岐山北漆溪謂之柴渠西南流注岐水但川土奇異  
 今說互出考之經史各有所據識淺見浮無以辨之矣

王應麟詩地理攷曰沮漆名稱相亂水經云沮水出北  
 地郡直路縣東過馮翊殺羽縣北東入于洛此沮水之  
 源流也漢志扶風有漆縣漆水在縣西東入渭又關駟  
 十三州記云漆水出漆縣西北至岐山東入渭此漆水  
 之源流也沮水出北地入洛漆水出扶風入渭沮自沮  
 漆自漆也至孔氏引水經云沮水俗謂之漆水又謂之  
 漆沮此則名稱相亂矣諸家書解以出扶風之漆水與  
 出北地之沮水為二謂扶風之漆水至岐山入渭在灃  
 之上流而書言渭水會灃會涇之後乃過漆沮則漆沮  
 在灃水涇水之下流故以書之漆沮為出北地之漆沮  
 與詩扶風之漆別也但水經出北地者止是沮水而謂  
 之漆沮耳如上所言之則詩之漆沮自是二水書之漆沮  
 止是一水即詩之沮也然水經之沮入洛書之漆沮則  
 入渭沮水若為漆沮一名洛水經之沮入洛書之漆沮則

入洛何也姑闕之以俟知者程氏大昌雍錄曰禹貢止  
 有漆沮秦漢以後始有洛水諸家言洛即漆沮所謂洛  
 水者地理志曰出北歸縣戎夷中今按其水自入塞後  
 逕鄜坊同之三州乃始入渭孔安國輩謂自馮翊懷德  
 縣入渭者是也漢懷德同州衙縣也所謂沮水者長安  
 志曰自邠州東北來至華原縣南流乃合漆水入富平  
 縣石川河石川河者沮水正派也所謂漆水者長安志  
 曰漆水自華原縣東北同官縣界來南流入富平縣石  
 川河是為合漆之地此三水分合之詳也若槩三水而  
 命其方則漆在沮東至華原而西乃始合沮沮在漆西  
 既已受漆則遂南東而合乎洛洛又在漆沮之東至同  
 州白水縣則遂混為一流故自孔安國班固以後論著  
 此水者皆指懷德入渭之水以為洛水而曰洛即漆沮  
 者言其本同也洛之別名不知起自何世秦用鄭國鑿  
 谷口渠已曰鑿涇注洛則洛久出秦前矣若其立洛名  
 而蓋掩漆沮則難究其始也一清按程文簡公辨洛漆  
 沮三水甚詳足破羣疑其云洛之別名不知何始周禮  
 雍州浸曰渭洛具載職方豈所論于嬴氏之朝乎又北  
 歸縣是地理志北  
 地郡歸德縣之誤

澮水出京兆藍田谷北入於灃

地理志曰澮水出南陵縣之藍田谷西北流與一水合

水出西南莽谷東北流注澮水澮水又北歷藍田川北

流注於灃水地理志曰澮水北至灃陵入灃水全氏曰漢志京

兆尹南陵縣沂水出藍田谷北至灃陵入灃師古曰沂音先歷反按酈注首尾再引班志似是沂水之即澮水也但不知何以誤澮為沂而沂又何有涅音也一清按此是今本漢書傳刻之訛宏農郡析縣師古音先歷反沂與析字形相近先歷之音于析則是而沂則非也行間斷爛何人填補致斯巨繆若師古不應如是之質也沂水字亦作涅見渭水注霸陵縣可知本字不誤而其音則非

澮水出北地直路縣東過馮翊郡北東入於洛按一清

本水經澮水今俗誤作沮史記索隱曰沮水地理志無文而水經以澮水出北地直路縣東過馮翊郡北東入於洛說

文澮水出北地直路西東入洛从水盧聲側加切沮水出漢中房陵東入江从水且聲子余切今北地之澮與漢中之沮更無分別觀小司馬所引猶見唐時水經之善與許氏字說合也

地理志曰沮出畿縣西東入洛一清按地理志北地郡

洛不云畿縣也畿縣之名不見漢志東西之文又互相異酈氏所引未知何據而司馬貞云沮水地理志無文更不解其義也今按孔穎達尚書正義導渭又東過漆沮下云彼漆則扶風漆水也彼沮則未聞蓋孔傳以漆沮為二水名亦曰洛水而後之言洛水者總以漆沮之名當之此是不與班志之漆沮同故胡朏明曰本疏引扶風漆水蓋未定之論失于刊正耳然則雍州及導渭之漆沮當依顏師古漢書注漆沮即馮翊之洛水為據而與班志扶風漆縣下之漆水北地直路下之沮水不相扶同此小司馬所以云地理志無文孔仲達亦云彼沮則未聞也

今水自直路縣東南逕燹石山東南流歷檀臺

川俗謂之檀臺水屈而夾山西流又西南逕宜君川世

又謂之宜君水又得黃嶽水口水西北出雲陽縣石門山黃嶽谷東南流注宜君水又東南流逕殺羽縣故城西縣以漢景帝二年置其水南合銅官水水出縣東北西南逕銅官川謂之銅官水又西南流逕殺羽縣東西南流逕其城南原下而西南注宜君水宜君水又南出土門山西又謂之澧水又東南歷土門南原下東逕懷德城南城在北原上一清按寰宇記懷德故城在今富平縣西南十一里非漢懷德縣也蓋後漢及三國時因漢舊名于此立縣今有廢城存括地志懷德故城在同州朝邑縣西南四十三里據此則是漢縣與此城有別又東逕漢太上皇陵北陵在南原上澧水東注鄭渠昔韓欲令秦無東伐使水工鄭國間秦鑿涇引

水謂之鄭渠渠首上承涇水於中山西邸瓠口所謂瓠中也爾雅以為周焦穫矣為渠竝北山東注洛三百餘里欲以溉田中作而覺秦欲殺鄭國曰始臣為間然渠成亦秦之利卒使就渠渠成而用注填闕之水溉澤鹵之地四萬餘頃收皆畝一鍾關中沃野無復凶年秦以富強卒并諸侯命曰鄭渠渠瀆東逕宜秋城北又東逕中山南河渠書曰鑿涇水自中山西封禪書漢武帝獲寶鼎于汾陰將薦之甘泉鼎至中山氤氳有黃雲蓋焉徐廣史記音義曰關中有中山非冀州者也指證此山俗謂之仲山非也一清按顧祖禹曰圖經中山北接峩峩西距冶谷南並九嶷涇河自中而

出故名中山一云以山在治谷水西涇水東也俗  
譌仲山云漢高祖兄仲居此道元以為非得之矣鄭渠

又東逕捨車宮南絕冶谷水鄭渠故瀆又東逕截薛山

南池陽縣故城北又東絕清水又東逕北原下濁水注

焉一清按孔氏尚書正義引注作濯水自濁水以上無一清按下有脫文濁水上

承雲陽縣東大黑泉東南流謂之濁谷水又東南出原

注鄭渠又東歷原逕曲梁城北又東逕太上陵南原下

北屈逕原東與澧水合分為二水一水東南出即濁水

也至白渠與澤泉合俗謂之柴水又謂之為柴沮水絕

白渠東逕萬年縣故城北為櫟陽渠城即櫟陽宮也漢

高帝葬皇考于是縣起墳陵署邑號改曰萬年也地理

志曰馮翊萬年縣高帝置王莽曰異赤也故徐廣史記

音義曰櫟陽今萬年矣闕駟曰縣西有涇渭北有小河

謂此水也其水又南屈更名石川水又西南逕郭猿城

西與白渠枝渠合又南入於渭水也其一水東出即澧

水也東與澤泉合水出澧東澤中與澧水隔原相去十

五里俗謂是水為柴水也東流逕薄昭墓南冢在北原

上又逕懷德城北東南注鄭渠合澧水又自澧直絕注

濁水至白渠合焉故濁水得柴沮之名也澧循鄭渠東

逕當道城南城在頻陽縣故城南頻陽宮也秦厲公置

城北有頻山山有漢武帝殿以石架之縣在山南故曰

頻陽也應劭曰縣在頻水之陽今縣之左右無水以應之所可當者惟鄭渠與瀘水又東逕蓮芍縣故城北十三州志曰縣以草受名也瀘水又東逕漢光武故城北又東逕粟邑縣故城北王莽更名粟城也後漢封騎都尉耿夔爲侯國其水又東北流注於洛水也

補洛水

禹貢錐指曰禹貢豫有洛而雍無洛洛水之名其昉於殷周之際乎周禮雍州之浸曰渭洛水經無洛水之目唯沮水渭水注中一見然寰宇記慶州安化縣尉李城下引水經注云洛川南逕尉李城東北合馬嶺水號白

馬水華池縣子午山舊名翟道山一謂之雞山引水經云有烏雞水出焉西北注於洛水樂蟠縣有水出縣西北引水經注云與青山水合寧州安定縣洛水下引水經一名馬嶺川水注云洛水又南逕栒邑故城北與新陽川水合珊瑚谷水下引水經云珊瑚水東南至栒邑入洛襄樂縣大延水下引水經注云大延小延水出油水南延溪西南流逕襄樂南於延城西二水合流油水下引水經云與追語川水竝出東翟道山鄜州洛交縣白水下引水經云白水源出分水嶺三川縣葦谷水下引水經注云自葦谷東南流入三川黃原水下引水經

注云砂羅谷水南流逕黃原祠東合葦川坊州中部縣石堂山下引水經注云豬水西出翟道縣西石堂山本名翟道山穆天子傳曰癸酉天子命駕八駿之駟造父為御南征朔野逕絕翟道升於太行翟道即縣之石堂山也郭璞以為隴右狄道非也淺石川下引水經云淺石川水出翟道山香川水下引水經注云香川水出中部縣北香山在縣西南三十七里自宜君縣界來南香水在縣南三十五里出遺谷泥水下引水經云泥水出翟道縣泥谷蒲水下引水經注云蒲谷水源出中部縣蒲谷原丹州宜川縣丹陽川下引水經云蒲川水自鄜

州洛川縣流入丹陽川延州膚施縣清水下引水經注云清水出上郡北流至老人谷俗謂老人谷水又東逕高奴縣合豐林水同州馮翊縣商原下引水經注云洛水南逕商原西俗謂許原也

一清按許原顧祖禹引水經注作許原云志云沮水

之許也沙阜下引水經注云洛水東逕沙阜北其阜東西

八十里南北三十里俗名之曰沙苑澄城縣新城下引水經注云雲門谷水源出澄城縣界朝邑縣朝坂下引水經注云洛水東南歷彊梁原俗所謂朝坂此皆言洛水而今本無之是水經原有洛水篇宋初尚存後乃亡之耳一清按胡氏所引寰宇記清水一條已見卷三河



水注蓋偶有不照也漢志北地郡郁郅縣泥水出北蠻夷中有牧師苑官又有泥陽縣莽曰泥陰蓋泥水所逕也說文作沂水沂泥字通用蒲谷水亦見渭水注中又寰宇記安化縣下云周地圖記云郁郅城今名尉李城注水經云尉李城亦曰不窟城澄城縣溫泉下引水經注云水有三源奇川鴻瀉西注於洛亦曰帝嚳泉丹州汾川縣下引水經注云汾川縣西有殺狗嶺初學記丹州引水經注云烏川水出汾川縣西北按汾川縣本漢上郡地魏太和八年置安平縣屬北汾州其州在河西三堡鎮東更有南汾州魏大統十八年省北汾州乃取

丹陽川號立汾川縣道元卒於孝昌三年下距大統十八年已歷二十六年何緣知有置縣事乎且西魏文帝殂於大統十七年三月明年廢帝欽元年亦非十八年也汾川縣之文得無誤耶魏書地形志云汾州延和三年爲鎮太和十二年置州治蒲子城孝昌中陷移治西河事見北史裴延儻傳延儻從祖弟良稍遷尚書考功郎中時汾州吐京胡薛羽等作逆以良兼尚書左丞爲西北道行臺山胡劉蠡升自云有聖術胡人信之咸相影附以良爲汾州刺史加輔國將軍行臺如故良以城人飢窘夜率衆奔西河汾州之居西河自良始也又初

學記引水經注云丹州豬水流逕柏城遼州兔川西南流注洛水蒲州小蒲川水東南流入坊州大平御覽引水經曰白於山今名女郎山上多松柏下多樗櫟其獸多牝牛羝羊鳥多白鷄洛水出於其陽東注於渭也又洛水源出縣北白於山按括地志曰白於山在慶州洛源縣所謂縣北卽洛源縣之北也山海經曰孟山西百五十里曰白於之山其鳥多鷄郭璞曰鷄似鳩而青色盛宏之荊州記云有鳥如鷄雞其名爲鷄楚人謂之鷄史記索隱引水經曰洛水出上郡彫陰秦冒山過華陰入渭此真漢代經文洛水之源委具焉漢志北地郡歸德縣下云洛水出北蠻夷中入河左馮翊懷德縣下云洛水東南入渭蓋由渭以達於河也又河水注云河水又南洛水自獵山枝分東派東南注於河全祖望曰此洛水卽雍州北地之所出也經流則合漆沮以入渭而支流則自上郡入河史記晉文公攘戎翟居於囿洛之間是洛水地望之見於七國之先者地理志引職方冀州之浸曰汾潞闕駟以爲潞卽濁漳是也而師古曰潞出歸德蓋以潞爲洛繆之甚矣

水經注釋卷十六終

水經注釋卷十七

仁和趙一清誠夫錄

渭水上

渭水出隴西首陽縣渭谷亭南鳥鼠山

渭水出首陽縣首陽山渭首亭南谷山在鳥鼠山西北  
此縣有高城嶺嶺上有城號渭源城渭水出焉三源合  
注東北流逕首陽縣西與別源合水南出鳥鼠山渭水  
出谷尚書禹貢所謂渭出鳥鼠者也地說曰鳥鼠山同  
穴之枝幹也渭水出其中東北流過同穴枝閒既言其  
過明非一水也又東北流而會于殊源也渭水東南流

逕首陽縣南右得封溪水次南得廣相溪水次東得共谷水左則天馬溪水次南則伯陽谷水竝參差翼注亂流東南出矣

又北過襄武縣北

廣陽水出西山二源合注共成一川東北流注于渭渭水又東南逕襄武縣東北荆頭川水入焉水出襄武西南鳥鼠山荆谷東北逕襄武縣故城北王莽更名相桓漢護羌校尉溫序行部爲隗囂部將苟宇所拘銜鬚自刎處也其水東北流注于渭渭水常若東南不東北也又東泉水注之水出西南雀富谷東北逕襄武縣南東

北流入于渭魏志稱咸熙二年襄武上言大人見身長三丈餘跡長三尺二寸白髮著黃單衣巾拄杖呼民王始語云今當太平十二月天祿永終歷數在晉遂遷魏而事晉

又東過獮道縣南

右則岑溪水次則同水其左則過水合注之渭水東南逕獮道縣故城西昔秦孝公西斬戎之獮王于此應劭曰獮戎邑也漢靈帝中平五年別爲南安郡赤亭水出郡之東山赤谷西流逕城北南入渭水渭水又逕城南得粟水水出西南安都谷東北流注于渭渭水又東新

興川水出西南烏鼠山二源合舍東北流與彰川合水  
 出西南溪下東北至彰縣南本屬故道侯尉治後漢縣  
 之永元元年和帝封耿秉為侯國也萬年川水出南山  
 東北流注之又東北注新興川又東北逕新興縣北晉  
 書地道記南安之屬縣也其水又東北與南川水合水  
 出西南山下東北合北水又東北注于渭水渭水又東  
 逕武城縣西武城川水入焉津源所導出鹿部西山兩  
 源合注東北流逕鹿部南亦謂之鹿部水又東北昌邱  
 水出西南邱下東北注武城水亂流東北注渭水渭水  
 又東入武陽川又有關城川水出南安城谷水出北邱

川參差注渭水渭水又東逕落門西山

一清按章懷後漢書註曰隴西

縣東南有落門山落門水出焉

東流三府谷水注之三川統一東北流

注于渭水有落門聚昔馮異攻落門未拔而薨建武十

年來歛又攻之擒隗囂子純隴右平渭水自落門東至

黑水峽左右六水夾注左則武陽溪水東北得土門谷

水俱出北山南流入渭右則溫谷水次東有故城溪水

次東有閭里溪水亦名習溪水次東有黑水竝出南山

北流入渭渭水又東出黑水峽歷冀川

又東過冀縣北

一清按說文驥下云天水有驥縣是驥字

渭水自黑水峽至岑峽南北一十水注之北則溫谷水

注之其水導源平襄縣南山溫溪東北流逕平襄縣故城南故襄戎邑也王莽之所謂平相矣其水東南流歷三堆南又東流而南屈入黃槐川一清按此處有脫字梗津渠冬則輟流春夏水盛則通川注渭次則午谷水南入渭水南有長塹谷水次東有安蒲溪水次東有衣谷水竝南出朱圉山山在梧中聚有石鼓不擊自鳴鳴則兵起漢成帝鴻嘉三年天水冀南山有大石自鳴聲隱隱如雷有頃止聞于平襄二百四十里野雞皆鳴石長丈三尺廣厚略等在崖脇去地一二百餘丈民俗名曰石鼓石鼓鳴則有兵是歲廣漢鉗子攻死囚盜庫兵略吏民衣繡衣

自號爲山君黨與寢廣明年冬伏誅自歸者三千餘人信而有徵矣其水北逕冀縣故城北秦武公十年伐冀戎縣之故天水郡治王莽更名填戎縣曰冀治漢明帝永平十七年改曰漢陽郡城卽隗囂稱西伯所居也後漢馬超之圍冀也涼州別駕閻伯儉潛出水中將告急夏侯淵爲超所擒令告城無救伯儉曰大軍方至咸稱萬歲超怒數之伯儉曰卿欲令長者出不義之言乎遂殺之渭水又東合冀水水出冀谷次東有濁谷水次東有當里溪水次東有託里水次東有渠谷水次東有黃土川水俱出南北山逕冀城東而北流注于渭渭水又

東出岑峽入新陽川逕新陽下城南溪谷赤蒿二水竝出南山東北入渭水渭水又東與新陽崖水合即隴水也東北出隴山其水西流隴右逕瓦亭南隗囂聞略陽陷使牛邯守瓦亭即此亭也其水亦出隴山東南流歷瓦亭北又西南合為一水謂之瓦亭川一清按寰宇記引郡國志曰烏氏縣有五亭一名薄落亭今本續志云烏枝有五亭出薄落谷蓋有缺文疑當作烏枝有五亭一名薄落亭瓦亭水出薄落谷也西南流逕清賓溪北又西南與黑水合水出黑城北西南逕黑城西西南流莫吾南川水注之水東北出隴垂西南流歷黑城南注黑水黑水西南出懸鏡峽又西南入瓦亭川又有澁水自西來會世謂之鹿角

口一清按漢志安定郡烏氏縣烏水出西北入河都盧山在西莽曰烏亭劉昭郡國志補註曰本傳有龍池山地道記曰烏水出焉烏水即黑水之異名乎寰宇記潘原縣烏水出都盧山有西烏水又東北逕烏氏縣東注于涇謂之閻川水然涇水間有石巖東會兩川也西烏水即所謂澁水自西來會者也懸鏡峽即所謂石巖乎又隴西記曰襄武縣有錦鏡峽即黑水所經其峽四望花木明媚炤影其中因名漢志云入河而此注云入渭寰宇記云入涇涇渭合流蓋由渭以達于河也又南逕阿陽縣故城東中平

元年北地羌胡與邊章侵隴右漢陽長史蓋勳屯阿陽以拒賊即此城也其水又南與燕無水合水源延發東山西注瓦亭水瓦亭水又南左會方城川西注瓦亭水瓦亭水又南逕成紀縣東歷長離川謂之長離水右與成紀水合水導源西北當亭川東流出破石峽津流遂

斷故瀆東逕成紀縣故帝太皞庖犧所生之處也漢氏

以為天水郡縣句王莽之阿陽郡治也一清按漢志莽

戎此又云阿陽蓋是支郡所謂大郡至分為五者也又東潛源隱發通之成紀水

東南入瓦亭川川水又東南與受渠水相會水東出大

隴山西逕受渠亭北又西南入瓦亭川川水又西南流

歷僵人峽路側巖上有死人僵尸巒穴故岫壑取名焉

釋鞍就穴直上可百餘仞石路透迤劣通單步僵尸倚

窟枯骨尚全唯無膚髮而已訪其川居之士云其鄉中

父老作兒童時已聞其長舊傳此當是數百年骸矣其

水又西南與略陽川水合水出隴山香谷西流右則單

溪西注左則閣川水入焉其水又西歷蒲池郊石魯水

出東南石魯溪西北注之其水又西入略陽川西得破

社谷水次西得平相谷水又西得金里谷水又西得南

室水又西得蹠谷水竝出南山北流于略陽城東揚波

北注川水又西逕略陽道故城北堽渠水出南山北逕

堽峽北入城建武八年中郎將來歙與祭遵所部護軍

王忠右輔將軍朱寵將二千人皆持鹵刀斧自安民縣

之楊城永始二年成帝罷安定呼他苑以為安民縣起

官寺市里全氏曰永始二以下二十二字是注中注

按漢書此是平帝元始二年事師古曰中山之安定呼他即呼池善長所引誤矣班志無安民縣蓋暫置



而即省者一清按劉昭郡國志補注安定郡臨涇縣下引謝承書曰宣仲為長史民叛畱改宜民見李固傳而志無此改豈承之妄乎宜民疑即安民之訛蓋西京已有是稱不始于宣仲昭以承說為妄當矣又地理志鉅鹿郡有安定縣其故城在今祁州東鹿縣西七里此即中山之安定也元和志深州鹿城縣東至州二十五里本漢安定縣地屬鉅鹿郡隋開皇三年改為鹿城取縣東故鹿城為名滹沱河在縣西北四十二里苑蓋取水為從番須回中伐樹木開山道至略陽夜襲擊囂拒守將軍金梁等皆殺之因保其城隗囂聞略陽陷悉眾以攻歙激水灌城光武親將救之囂走西城世祖與來歙會于此其水自城北注川一水二川蓋囂所塌以灌略陽也川水西得白楊泉又西得蒲谷水西得蒲谷西川又西得龍尾溪水與蒲谷水合俱出南山飛清北入川

水又西南得水洛口水源東導隴山西逕水洛亭西南流又得犢奴水口水出隴山西逕犢奴川又西逕水洛亭南西北注之亂流西南逕石門峽謂之石門水西南注略陽川略陽川水又西北流入瓦亭水瓦亭水又西南出顯親峽石宕水注之水出北山山上有女媧祠庖羲之後有帝女媧焉與神農為三皇矣其水南流注瓦亭水瓦亭水又西南逕顯親縣故城東南漢封大鴻臚竇固為侯國自石宕次得蝦蟆溪水又得金黑水又得宜都溪水咸出左右參差相入瓦亭水又東南合安夷川口水源東出胡谷西北流歷夷川水與東陽川水會

謂之取陽交又西得何宕川水又西得羅漢水竝自東北西南注夷水夷水又西逕顯親縣南西注瓦亭水瓦亭水又東南得大華谷水又東南得折里溪水又東得六谷水皆出近溪湍峽注瓦亭水又東南出新陽峽崖岫壁立水出其間謂之新陽崖水又東南流入于渭是也

又東過上邽縣

渭水東歷縣北封山之陰流逕固嶺東北東南流蘭渠川水出自北山帶佩衆溪南流注于渭渭水東南與神澗水合開山圖所謂靈泉池也俗名之爲萬石灣淵深

不測實爲靈異先後漫遊者多離其斃渭水又東南得歷泉水北出歷泉溪東南流注于渭渭水又東南出橋亭西又南得藉水口水出西山百澗聲流總成一川東歷當亭川卽當亭縣治也左則當亭水注之右則會席水入焉又東與大弁川水合水出西山二源合注東歷大弁川東南流注于藉水藉水又東南流與竹嶺水合水出南山竹嶺二源同瀉東北入藉水藉水又東北入上邽縣左佩五水東會占溪水次東有大魯谷水次東得小魯谷水次東有楊反谷水咸自北山流注藉水藉水右帶五水竹嶺東得亂石溪水次東得木門谷水次

東得羅城溪水次東得山谷水皆導源南山北流入藉水藉水又東黃瓜水注之其水發源黃瓜西谷東流逕黃瓜縣北又東清溪白水左右夾注又東北大旱谷水南出旱溪歷澗北流泉溪委漾同注黃瓜水黃瓜水又東北歷赤谷咸歸于藉藉水又東合毛泉谷水又東逕上邽縣故城南又得覈泉水竝出南山北流注于藉藉水即洋水也北有濛水注焉水出縣西北邽山翼帶衆流積以成溪東流南屈逕上邽縣故城西側城南出上邽故邽戎國也秦武公十年伐邽縣之舊天水郡治清按晉志魏志天水郡皆治上邽與兩漢之治冀縣異道元故分別言之五城相接北城中

有湖水有白龍出是湖風雨隨之故漢武帝元鼎三年

改爲天水郡

一清按漢志天水郡師古引秦中記云郡前湖水冬夏無增減因以名焉其鄉

居悉以板蓋屋詩所謂西戎板屋也濛水又南注藉水

山海經曰邽山濛水出焉而南流注于洋謂是水也藉

水又東得陽谷水又東得宕谷水竝自南山北入于藉

藉水又東合段溪水水出西南馬門溪東北流合藉水

藉水又東入于渭渭水又歷橋亭南而入縣諸縣東與

東亭水合亦謂之爲橋水也清水又或爲通稱矣水源

東發小隴山衆川瀉浪統成一水西入東亭川爲東亭

水與小祗大祗二水合又西北得南神谷水三川竝出

東南差池瀉注又有埋蒲水翼帶二川與延水竝西南注東亭水東亭水又西右則曠溝水次西得麴谷水水側出東南二溪西北流注東亭川東亭川水右則溫谷水出小隴山又西蒞谷水出南山蒞溪西南注東亭川水東亭川水又西得清水口清水導源東北隴山二源俱發西南出隴口合成一水西南流歷細野峽逕清池谷又逕清水縣故城東王莽之識睦縣矣其水西南合東亭川謂之清水口又逕清水縣故城南又西與秦水合水出東北大隴山秦谷二源雙導歷三泉合成一水而歷秦川川有故秦亭秦仲所封也秦之為號始自是

矣一清按地理志曰孝王曰昔伯益知禽獸子孫不絕乃封為附庸邑之于秦今隴西秦亭秦谷是也郡國志曰豬坻秦水西逕降隴縣故城南又西南自亥松多聚有秦亭

一清按松多胡名也晉大興二年屠各胡松多起兵二附晉王保據草壁劉曜攻拔之松多奔隴城是也

水出隴山合而西南流逕降隴城北又西南注秦水秦水又西南歷隴川逕六槃口過清水城西南注清水清水上咸謂之秦川又西羌水注焉水北出羌谷引納衆流合以成溪澍水星會謂之小羌水西南流左則長谷水西南注之右則東部水東南入焉羌水又南入清水清水又西南得縣諸水口其水導源西北縣諸溪東南與長思水合北出長思溪南入縣諸水又東南歷縣

諸道故城北東南入清水清水東南注渭渭水又東南合涇谷水水出西南涇谷之山東北流與橫水合水出東南橫谷西北逕橫水壙又西北涇谷水亂流西北出涇谷峽又西北軒轅谷水注之水出南山軒轅溪南安姚瞻以爲黃帝生于天水在上邽城東七十里軒轅谷皇甫謐云生壽邱邱在魯東門北未知孰是也其水北流注涇谷水又西北合白城溪東北流白娥泉水出其西東注白城水白城水又東北入涇谷水涇谷水又東北歷董亭下楊難當使兄子保宗鎮董亭卽是亭也其水東北流注于渭山海經曰涇谷之山涇水出焉東南

流注于渭是也渭水又東伯陽谷水入焉水出刑馬山之伯陽谷北流白水出東南白溪西北注伯陽水伯陽水又西北歷谷引控羣流北注渭水又東歷大利又東南流苗谷水注之水南出刑馬山北歷平作西北逕苗谷屈而東逕伯陽城南謂之伯陽川蓋李耳西入往逕所由故山原畎谷往往播其名焉渭水東南流衆川瀉浪邊次鳴注左則伯陽東溪水注之次東得望松水次東得毛六溪水次東得皮周谷水次東得黃杜東溪水並出北山南入渭水其右則胡谷水次東得邱谷水次東得邱谷東溪水次東有銅巖谷水並出南山東北注

渭渭水又東南出石門度小隴山逕南由縣南東與楚水合世所謂長蛇水水出汧縣之數歷山也南流逕長蛇戍東魏和平三年築徙諸流民以遏隴寇楚水又南流注于渭闕駟以是水爲汧水焉又東汧汧二水入焉余按諸地志汧水出汧縣西北闕駟十三州志與此同復以汧水爲龍魚水蓋以其津流逕通而更攝其通稱矣渭水東入散關抱朴子神仙傳曰老子西出關關令尹喜候氣知真人將有西遊者遇老子彊令之著書耳不得已爲著道德二經謂之老子書也有老子廟于寶搜神記云老子將西入關關令尹喜好道之士覩真人

當西乃要之途也皇甫士安高士傳云老子爲周柱下史及周衰乃以官隱爲周守藏室史積八十餘年好無名接而世莫知其真人也至周景王十年孔子年十七遂適周見老聃然幽王失其道平王東遷關以捍移人以職徙尹喜候氣非此明矣而往逕所由茲焉或可渭水又東逕武功縣西北俗以散關名城非也褚先生乃曰武功扶風西界小邑也蜀口棧道近山無他豪易高者是也渭水又與捍水合水出周道谷北逕武都故道縣之故城西王莽更名曰善治也故道縣有怒特祠列異傳曰武都故道縣有怒特祠云神本南山大梓也昔

秦文公二十七年伐之樹瘡隨合秦文公乃遣四十人持斧砍之猶不斷疲士一人傷足不能去臥樹下聞鬼相與言曰勞攻戰乎其一曰足為勞矣又曰秦公必持不休答曰其如我何又曰赤灰跋於子何如乃默無言臥者以告令士皆赤衣隨所砍以灰跋樹斷化為牛入水故秦為立祠其水又東北歷大散關而入渭水也渭水又東南右合南山五谿水夾澗流注之也

又東過陳倉縣西

縣有陳倉山山上有陳寶雞鳴祠昔秦文公感伯陽之言遊獵于陳倉遇之于北坂得若石焉其色如肝歸而寶

祠之故曰陳寶其來也自東南暉暉聲若雷野雞皆鳴故曰雞鳴神也地理志曰有上公明星黃帝孫舜妻盲

冢祠有羽陽宮秦武王起應劭曰縣氏陳山姚睦

一清按上

云南安姚瞻此云姚睦未知即一人也抑誤字也

曰黃帝都陳言在此榮氏開

山圖注曰伏犧生成紀徙治陳倉也非陳國所建也魏明帝遣將軍太原郝昭築陳倉城成諸葛亮圍之亮使昭鄉人靳祥說之不下亮以數萬攻昭千餘人以雲梯衝車地道逼射昭昭以火射連石拒之亮不利而還今汧水對亮城是與昭相禦處也陳倉水出于陳倉山下東南流注于渭水渭水又東與綏陽谿水合其水上承

斜水水自斜谷分注綏陽谿北屈陳倉入渭故諸葛亮與兄瑾書曰有綏陽小谷雖山崖絕重谿水縱橫難用行軍昔邏候往來要道通人今使前軍斫治此道以向陳倉足以板連賊勢使不得分兵東行者也渭水又東逕郁夷縣故城南地理志曰有汧水祠王莽更之曰郁平也東觀漢記曰隗囂圍來歙於略陽世祖詔曰桃花水出船槃皆至郁夷陳倉分部而進者也汧水入焉水出汧縣之蒲谷鄉弦中谷決爲弦蒲藪爾雅曰水決之澤爲汧汧之爲名實兼斯舉水有二源一水出縣西山世謂之小隴山巖嶂高峻不通軌轍故張衡四愁詩曰

我所思兮在漢陽欲往從之隴坂長其水東北流歷澗注以成淵潭漲不測出五色魚俗以爲靈而莫敢採捕因謂是水爲龍魚水自下亦通謂之龍魚川川水東逕汧縣故城北史記秦文公東獵汧田因遂都其地是也又東歷澤亂爲一水右曰龍泉泉逕五尺源流奮通淪漪四泄東北流注于汧汧水又東會一水發南山西側俗以此山爲吳山三峯霞舉豐秀雲天崩巒傾返山頂相捍望之恆有落勢地理志曰吳山在縣西古文以爲汧山也國語所謂虞矣山下石穴廣四尺高七尺水溢石空懸波側注崩洊震盪發源成川北流注于汧自水



會上下咸謂之龍魚川汧水又東南逕隃麋縣故城南

王莽之扶亭也昔郭欽恥王莽之徵而遜跡於斯按漢

書鮑宣傳是郭欽然郭欽有二一在王莽傳見於鮑宣

傳者不受莽徵閉戶而終見于王莽傳者仕莽為戊己

校尉拜填外將軍封剽胡子後列于九虎兵敗守倉降

于更始封侯姓名同而行事絕不相侔今道元以不受

莽徵者為郭欽則是與世本漢書異抑或六

朝古本原是欽字而訛而為欽未可知也建武四年

光武封耿況為侯國矣汧水東南歷慈山東南逕郁夷

縣一清按下有脫文逕平陽故城南史記秦寧公二年徙平陽

徐廣曰故郿之平陽亭也城北有漢邠州刺史趙融碑

靈帝建安元年立一清按靈帝紀元為建寧獻帝紀元

為建安未知靈字誤也抑安字訛也汧水又東流注于渭渭水之右磻谿水注之水出南山

茲谷乘高激流注于谿中谿中有泉謂之茲泉泉水潭

積自成淵渚即呂氏春秋所謂太公釣茲泉也今人謂

之凡谷石壁深高幽隍邃密林障秀阻人跡罕交東南

隅有一石室蓋太公所居也水次平石釣處即太公垂

釣之所也其投竿踞餌兩鄰遺跡猶存是有磻谿之稱

也其水清冷神異北流十二里注于渭北去維堆城七

十里渭水又東逕積石原即北原也青龍二年諸葛亮

出斜谷與司馬懿一清按下有脫文屯渭南雍州刺史郭淮策

亮必爭北原而屯遂先據之亮至果不得上渭水又東

逕五丈原北魏氏春秋曰諸葛亮據渭水南原司馬懿

謂諸將曰亮若出武功依山東轉者是其勇也若西上  
五丈原諸君無事矣亮果屯此原與懿相禦渭水又東  
逕郿縣故城南地理志曰右輔都尉治魏氏春秋諸葛  
亮寇郿司馬懿據郿拒亮卽此縣也

水經注釋卷十七終

